

原

富

原富部下

英倫斯密亞丹原本

侯官嚴復幾道翻譯

篇七

論外屬（亦譯殖民地）

以下論新地所以開闢之故

歐洲國有外屬。尙矣。古希臘羅馬之所以拓國也。始皆以救過庶之患。資殖民而已。輒近英法波西之置外屬於南北美西印度也。雖亦有殖民之用。顧其所始。常委曲而難明。不若古者希臘之事。顯而易見也。希臘多島國。而其勢內分。地褊戶稠。寔不能容。而鄰境之強庶相若。其勢不容并兼。則其民之健者。自析。舉族浮海。外索荒遠新地居之。此如多利嬰之族。則集於義大里昔利諸部矣。方羅馬之未興。此皆狂榛無化之壤也。而依阿念依阿連諸族。則集於亞洲之安息與伊索海中諸島矣。其

中之民物治化猶夫其義大里昔昔利也民既占新壤矣則其視舊邦如母舊邦視之亦如子有守望相助之恩然如子長家分爲父母者常聽其自主不爲君臣之勢以臨之也故名爲屬國實則自爲政制自張憲章自擇君尹其與鄰封有爭亦自決戰勝之宜不待請命舊邦而後行也其爲事如此舊史明晰可覆案也

羅馬以合衆興其土田有口分世業之制口分世業者以土壤分民各得分地耕之以傳其世者也人事降繁傳業分析之日多舊制常不可復并兼踰侈往往數家之田歸於一主欲救其治之末流則爲限田之制定一家之地不得過五百猶格拉五百猶格拉者約英田三百五十開克矣顧法立矣而民猶抗巧相遁故田制之不均自若貧富之殊降乃愈甚民之無田者衆無田則無業無業則其勢且不得爲齊民非若今世之俗民雖無田但有積蓄得賃田而耕抑隸市籍爲賈豎猶足自立也即不然而以其身爲雇傭爲工夥勢猶可以得食羅馬之世富家有田大抵畀群奴耕之而以大奴爲之務故貧民欲如今世之農佃傭耕不能城市工賈之業坐列閒肆

者亦大抵富家奴爲其主役財者負勢而有護非貧民所能與競者也故無土平民其所賴以爲生者特每歲推舉國尹立新時之領袖而已蓋羅馬律其中大官尹長歲山平民公推爲之新得立者則施惠徧及國中齊民其大將軍新拜者亦徧犒軍士以爲常有時操政柄者欲抑豪民巨室之勢則時時舉初制古法所謂分田限田者以徧其民於是無地者聚譁而巨室之力足相抗卒無所得則行徙民實新之政以慰安之此羅馬殖民地所由防也顧方其國之盛也國兵四出竊土歲闢其殖民也非徒古希臘與後世之索諸海外竄遠有無甘苦不可知而聽民自爲計也蓋羅馬舊都在義大里之境內夫已足用矣故名雖新地而其勢實同稍甸之附庸猶爲一民主之所制也新屬小小法制民得因地自宜其大經大法若兵刑賦稅之令則猶京羅馬之舊者所爲移民而殖於新者不徒取順民心而已力征新闢之地得此以鎮撫分戍之其疆圉乃益固故羅馬殖民之事與希臘有必不可同者不獨其所由起興也即其制亦大殊求於文字殖民地於羅馬拉體諸文曰哥倫尼亞言置戍

也。言建國也。於希臘額里思文曰。阿保幾亞。言分支也。言薩宗也。雖然。二者之事不同。而其出於不得已。而以救過庶者。則一而已矣。

輒近吾歐之於美洲。西印度也。雖亦哥命尼亞。而其事則與希臘二者皆殊。非由於不得已。一也。非以通過庶之民。二也。雖其爲用至衆。而欲明晰而言之。則又無可指之實際。其始立也。用意之的。既不可知。其後此之事驗也。又絕非當時覓地與來集者之所祈嚮。其體用之維何。其利益之廣狹。與夫流極之所底。試以問今之從政者。固未必能盡知也。

吾嘗夷考其事。則十四五二稔之間。溫匿斯人爲申椒齒桂之誦。致諸印度。而散於歐洲諸國之間。以得大利。彼未能運而取之於印度也。則常轉之於埃及焉。當此時。主埃及者爲馬美祿和。與西突厥爲世仇。而溫匿斯則亦仇突厥者也。其民甚富。爲馬美祿所貪。同仇共利。其交最睦。故其市幾爲溫匿斯之所專也。

而利賊波陀噶爾見而慕之。波多走海之民。十五稔間。其國嘗與非洲西北部莫

路戈通而得金砂象牙之利。二物者莫路戈民所絕。非洲大漠而得諸其南之幾尼亞者也。一美洲未通時歐洲之金多出於此。一以莫路戈之居間而利儉也。則日夜南駛求自通。幾尼亞之海道波之國瀕於大西洋。在地中海外。其勞便於爲此。於是十五稔之間。新地日出。若麥地拉。若庚孖利。若阿左里斯。若甲特威特。則非洲西偏之群島也。若幾尼亞。若羅嬰古。若剛戈。若安戈拉。若邊古意拉。則非洲西偏之海步與舊國也。而地維南盡。則以極南之好望角終焉。蓋所謂博浪山者矣。前者見溫匿斯香業之利。知印度之爲利數。則日夜扣心扼腕。求海道之可通。得博浪山爲中道之逆旅。故名其地爲好步頭。猶志喜之意也。一千四百九十七年。波人花思戈統海船四艘。發於力斯彭。航海十一周月。揆日候星。而抵印度之西岸。蓋求之以百年之勤。而一旦償其所欲得者。此歐亞二洲海通之始。二百年以降。來往成通塗矣。

花思戈之未得博浪山也。歐人之疑信半。於時稽奴亞走海人名科倫波者。濫於天算之學。推地員之理。知東亞之可以西通。當是時。人人欲達印度以甘心。而於其國

之經緯廣輪則莫指實即有一二際空遠游間關履其地者歸而著紀大抵多夸其
 繇遠若不可程計者徒言去歐絕遠而已於是科命波言果其地於東行絕遠則由
 西迴法宜益近由此而絕西溟以通泰東之畫遂決亦有天幸於時西班牙后伊薩
 白篤信其說出私財力相其行一千四百九十二年八月國帆出西之巴路斯澳風
 順波雷其十一月舟抵巴哈麻島則此後所謂聖多明戈者蓋其去西班牙較花思
 戈之去波陀噶爾爲先五年云

然而所欲求通者隱賑侈富之印度也支那也科命波先後所求得者皆非其倫若
 聖多明戈之孤島及更西各地雖於世爲創獲而其地皆深菁長篠不鑿不耕島夷
 卉服者之所居其去前二邦之庶富絕遠而科之意則以此爲同壤其景物草昧者
 以其處海濱隅僻之故自謂已之所得與瑪可波羅之所前載者初非二物也蓋西
 人之至東洲而以文字留傳後人者自瑪可波羅始一馬於元世祖時行賈安息大
 食間隨元使入中國見世祖旅居十餘年嘗爲揚州太守後航海由南洋達波斯歸

國紀所聞見甚詳足補元史所不備也。其文字翔實可信。歐人心嚮之。夫既意以爲同。則山川名字之間。往往傳會證合。而其與后伊薩自書。遂儼然稱其土爲印度矣。且謂恆河距之不遠。而亞烈山大所用武處。皆在邦域中。其謬誤自焚如此。卽後漸覺其非。而終謂去所刻者不遠。乃再出求之。而中美之地。若特拉斐瑪。若達利晏。以次出矣。

自科倫波之始誤。而後人沿襲。遂使山川不幸。無以自名。而永永稱印度。雖世塗日開。群曉然於二地之逕庭。而沿習既久。則以西印度別之。而稱真而舊者爲東印度。此中美群島所以稱西印度之實因也。

其擊舟裝糧而出也。既嘗爲西班牙之所資矣。故其得地雖荒瘠。至不足道。其還報也有不得不爲夸詞者。夫地之所以富者。要皆基於動植。而當是時。聖多明戈所可道者。居何等耶。則有魷魚者。其爲物介於鼠與兔之間。爲其地最大之走獸。其種類初不繁。既通而至者。挾猶犬與偕。不數年而魷魚與他類小小者盡。又有蜥蜴名蜉。

蟪較常種稍大。是二物者。其土人以爲芻豢焉。若植物。雖以民之皆無耕播者。然尙不絕。若玉米。若踴鴨。若薯蕷。若蕉實。所在多有。而皆爲歐洲所前無者。願得之莫之重也。其養人去五穀之屬遠矣。其所產者。獨吉貝爲可貴。蓋歐洲不產木棉。自得此於西印。而棉布之製績日繁。其衣被群生。殆過於皮革絲象而無不及者。願當十五稷之間。其事猶未起也。紗縠絺絺之屬。其以棉爲之。而至自亞洲者。固爲時人之所貴。而紡績之業。莫之或操。故雖其物誠珍。而當時之人不知重。新地之動植其無足稱如此。然則科命波欲得以塞責者。其惟求之升產中乎。方其初至也。見土人往往以金爲衣飾。叩所由來。則曰得諸谿澗顛崖之間。於是知其地之有腴礦。乃以是還報。自贊此行之不虛。若爲西班牙開無限利源也者。其返國也。朝謁王若后於喀斯提律。引咄臚行。若奏凱捷。所得新地物產。第進傳觀。旅爲庭實。然錄錄無足言者。獨金飾數品。及吉貝數苞。此爲可貴而已。其他若大鯨麗鳥鱗甲魚鬚之屬。皆得之不足爲富者。凡此以六七土人昇而先之。鯨皮哆口狀若鬼物。而科命波之所以還

報者盡矣。

西班牙開新地之業野無能爲。則定計掠有之。陽謂欲宣基督正教。開其蠻野。而陰則垂涎其地之金礦。於是科命波倡議。以其采取之半歸國王。而議院允行之。顧其始之得金銀也。非破山鑿洞而求之也。大抵奪土民所已有者。載之以歸。既無所費。則所謂以半歸公者。自無難耳。無如盜賊之行。有時而窮。六七年間。諸島見金皆罄。繼續求之。非掘地破石不可。費而後有。則雖欲守前約。常供半賦。勢不能也。責不過嚴。則相率棄之而已。法固有其不能不變。於是半者減而參之。浸假而伍之。猶不能。則什一焉。二十而一焉。其賦於金者如是。其銀稅則五而一之。至於本銀。始爲什一。蓋其民之來者。必得金而後娶其意。望於其銀。不以爲利也。

自科命波導其先路。後之浮海采金者。如雲而往。若烏亦達之於達利晏。若歌爾特之赴墨西哥。若麻古祿之至智利。若畢查魯之開秘魯。皆見紀述者。渴金之夫。至一新地。先問有金銀不。其去留之計。大抵以黃白之難易多寡定決之。

然而往往失利。民破家負債。起於事金銀二礦者尤多。此猶拈圖求臨空者至多。實者絕少。而每圖之價。必盡巨富之家。金礦之事。非若他者常業。復其本而加以贏率也。不幸而失。則母子兼亡。是故智者爲國主計。未嘗以礦勸民。而常聽民之自擇。設以法驅之。國財常病。人情計禍不及。慮福過之。心所樂則望之過。心所惡則思之不及。此采金破家者之所以衆也。

案斯密氏每及二礦之業。未嘗不反覆於其事之少利而多殃也。蓋其指迷之意切矣。此其論豈獨信於當時已哉。即今礦學日精。機器日巧。而其利害相權之分。則未改也。不佞嘗遇一礦師。交游累月。至瀕別。贈言曰。吾以礦爲業者也。然與子好。則贈言無他。戒勿買新礦股票而已。美澳新舊二金山。天下名出金處也。然其有益於世至寡。其所以富歐美之民。不在其金。在乎其地之播植。而所出生貨之日多。光緒初年間。澳洲所出羊毛。以噸計者百餘萬不止。即此其利於英國。夫豈區區出金之數所得比倫哉。至於今日。倍徙前數矣。

其理甚明如此。自人心之中於利慾。雖明弗從。是故其考物性事鍛鍊也。則求所謂點金石者焉。其浮海求新地也。則求所謂金銀山者焉。顧不謂金銀之所以見珍於世者。遂古以來。以其物之甚少故也。而其物之所以少者。以其伏於地者之有限。而雜他質難取故也。而渴利者必欲其物之賤而易取。若鉛銅錫鐵然。果如是。二品者雖多亦奚以爲。吾英魯拉禮者可謂通人矣。而著海外金城之書。大類說夢者。以此知雖通敏有道之士。至於逐利未嘗不昏也。後百餘年而耶穌會教士古美刺。揚魯拉禮之餘波。而擴實其說。吾又以此知雖脩身事天之家。號割絕世好者。至於求富未必不喪其所守也。

至於今彼西班牙人所得於聖多明戈諸島。肩肩無足道者。意其先所傳未必不過實也。而當時之人信之者多。凡航海者皆欲一至金城而甘心焉。今夫逐利之事若求神仙。雖所遇甚遠於所期。輒稍獲其近似者。而後求者乃不絕。故繼科倫波之後三四十年。而有墨西哥秘魯之拓地。二國皆富於礦產。雖以當金城之名。殆庶幾焉。

案後此金銀之出以前事驗之金當終難於銀他日者設以過多而失其易中之用則銀必先金今各國皆用金準而中國用銀銀之至中國者若水之趨壑恐數十年以往銀之降賤又不若今而易中本位既久則其變愈難此中國最可慮之一事也不幸吾國知計者鮮莫能爲之預圖則亦聽其自至而已夫金銀相受之率視出世者二物之多寡以今日黃白之賤欲銀之貴而不相懸難矣所幸者近世金之出礦者亦以歲多則其勢或不至於甚貴未可知也一己亥十月十三日天津報紙云美國查戊戌各國產金總值二百九十兆鎊於前年爲多五十三兆而各國中產數最鉅者若南非洲之特蘭斯哇七十九兆新金山六十八兆北美六十五兆俄羅斯二十五兆剛那達十四兆墨西哥十兆印度八兆支那六兆而本年之數當又多於戊戌果如是則金不至甚少明矣一

然則吾歐輓近殖民地之所山起可以見矣始以欲通印度之商而求所以通之之海道事出望外乃因之以得西印之群島得群島而有金於是拓地攘土之謀出此

南美諸步之所由立也。餘國西略者本意亦出於求金。一時皆無所得。巴西東屬波陀。噶爾百餘年。而後諸礦出。他若英吉利法蘭西德意志丹馬所占者。皆至今無礦。北美英屬礦稅值五取一。然無所納。又有從西北道求通印度支那者。亦至今未得其端倪也。

以下論新地所以浸盛之由

歐洲諸國之開地殖民也。始多荒穠。人跡不經之區。或野番所居。戶口寥落。則移民實之。不數年。野番殄殲。且盡。而屬地庶富。日以浸昌。有轉非舊土所敢望者。其故何耶。

民之由草昧而進文明也。使無所親感。則效而自興。則必歷數百千年。而後見。惟以化民入新地不然。其農工之術智。常遠勝於土著之所能。其民又大抵經數千年之治。使教化。其相資交養之道又良也。制爲刑典。禁其相欺。立之守禦。以相保持。其法美慮周。大抵非野番之所能至也。蓋進化之理。乘於自然。循序時至。不可以躐。而刑

禮之用其進也方諸技術爲尤難彼土人之於農工既已陋矣則所謂治理之美善國之所待以爲盛強者愈無望爾此化民既入之餘舊種之所以必無幸也彼既奪其地而有之矣一夫之所操往往常過其所能耕無地主則無租無國王則無稅自區其壤而自治之秋成之實皆其有也雖本國舊君不能無賦然大抵多徵既專其利雖未嘗不欲所出之至多而地廣力瘠所收者不過盡地之什一而已有助之耕所樂得也其酬庸也必厚庸厚則勞者之積儲易盈以善積之人居曠土之國其勢易分以自立則其野之盡闢而民之皆富無時也且生事易則嫁娶稠嫁娶稠則民丁庶方其萌穉以衣食乳哺之周而天癸者寡及其稍長筋力所得養其口體有餘文以地之易有也故長成皆田主

國古則租贏厚而庸率微得其二者貴與富也丐其一者勞手足之小民也小民常受制於貴富者惟新地則不然無奴功之可用則其待勞力者不得不優惟待勞力者優而後其利乃愈出所居土曠故雖甚狹之壤價常無多役財率作之家有所經

營其收利常甚厚。經營必資人功。人丁寡少難得。故其庸不得不優。而役財主地者。以遺利之宏。雖賁優庸。所不靳也。夫庸厚者。庶之先聲也。地廣而腴者。役財求利者之所勸也。夫如是。則始爲新地。不數十百年而蔚爲富盛之國者。又何疑焉。

案地產有限而民生無窮。國懷過庶之憂。至於今爲已極矣。蓋自物性盡而舟車通。亦治化進而天民者寡。戶口之進。倍蓰古初。不爲之地。將何以善其後乎。自科倫波肇通新地。洎今差四百餘年。南北美洲。其民幾滿。凡海外可居之小島。若檀香山。紐西蘭等。皆不數十年。山蠻獠狽榛而轉爲文物饒富。古阿非利加。世以鬼國視之。今則群雄爭先。惟憂所據者之不廣。亦以地廣人稀。於殖民最便故也。甲午東事以還。彼族常以剖分支那爲必至之事。顧無如其人滿何。此所以但挹其利源。而後其土地。至其力征經營。亦不以此易彼也。獨長城以外。生齒較稀。遼瀋之間。土地尤美。勸植以近海而滋。礦產以近極而積。則俄羅斯視爲禁地。而在所必爭者矣。且以遠近形勢言之。俄於支那。其情亦與各國異也。故中國之大患終

在俄頃者特蘭斯哇以蕞爾民主抗英以求自立英前相格來斯敦嘗聽之矣至
於今日則必不相容者英欲通非洲南北而特蘭當其孔道雖甚勞費不得不鋤
故也且英既有印度南非次道自所必爭爭之不得則英之全局將散故其地雖
小而所關甚鉅特蘭之役罷則亞東之爭起矣

此其事於古希臘之析民見之矣希臘之析民而實新地也其趨於富盛之機皆至
速大抵一二百年以往其文物聲明即可與故國抗其過之者往往有之此如在昔
昔利之錫拉庫斯與阿機曾丹也在義大里之達連丹與羅吉利也在安息之伊斐
穌與密里圖也方之舊邦未皇多讓其立國雖新而其中藝術學問詞章言語諸科
皆地有碩師各自造極舊邦學者無以尙之希臘名理之學其最古而著者兩宗其
一則大黎爲之職志其一則畢德哥拉爲之眉目而前則起於安息後則生於大秦
而皆不出於故土此尤足致人深思者矣蓋由其民既析而處於新其中僿野蠻昏
之民或爲所克削而亡或與之和同而化而其中立國駁衆之規後來居上大抵沿

其便而棄所不便者。夫治必變而後蒸。故土之爲變難。而新邦之改圖易。其所以然之故。殆如是已。

同爲殖民。而羅馬新國之興。遜於希臘甚遠。希臘之外屬。其文物教化。焜耀史冊。爲古今所歸稱。至於羅馬所屬。其於大秦解紐之餘。能足自立者。獨佛羅林司已耳。其進盛皆甚遲。無有若希臘諸屬之神速者。此蓋如前所云。其立事不同。其緣起亦異。移民於并兼之國。則其壤舊實。一也。分地有限。遺利無多。二也。土境毗連。故國制之三也。事同置戍。不再農工。四也。希臘分民。在在有自由之望。羅馬建國。未嘗界以自主之權。其效驗遂不同如此。

案稽之西史。則知羅馬殖民。其事略同。後日之西班牙。若古巴。若斐利賓。皆西班牙之殖民地也。然常爲舊法所束縛。故歷二百餘年。不能自進於盛大。道光緒戊戌。則以政之不中。古巴叛。北美起而乘之。而其屬散矣。五十年以往。英法邪主齊盟。爲歐洲之二霸。英之政大致類希臘。法之政大致宗羅馬。若德若瑞典。那威荷

蘭丹馬從夫英者也。若奧若義若西班牙若波陀噶爾從夫法者也。其風俗既殊。其宗教亦異。至於今俄德崛起其大勢。又稍變前矣。

後世殖民新洲新洲治化無可言。而土著亦稀少。故北美西印之間。以土壤論。大類希臘之外屬。且遠過之矣。而爲故國所制。則又類夫羅馬。然以其地之富饒。有難欲遙制而不可得者。則亦類以與民矣。故得享自由之福者。地實爲之。非故國示邦所樂與也。民之經營生業也。其風俗聯約。得爲所欲爲。不加抑制。則亦以遠難制。不得已而縱之。雖以西班牙之政之苛。而亦不能無貸舍。何則。操之過促。則民將舉起而圖自立故也。是故自得新洲殖民以還。其間財富戶口。與夫吹竅百工之業。皆大進云。

自新壤肇開。西班牙得礦稅。而國賦驟增。惟黃白爲物。其使貪夫心醉。方之他貨爲尤。故南美外屬以礦著者。皆見重於本國。其徒以殖民稱者。則聽其自爲計已耳。得之雖久。未嘗加經營也。雖然。前之屬不以其見重而休。後之屬亦未以其見忽而病。

也。若以壤地廣輪與戶口疏密合而評之。則西班牙之屬。隱乎在他國所屬後矣。然若與其未通之時比而論之。則不獨他國之屬爲大進。即西班牙所屬者。其進亦無涯。此若利瑪則自內屬以還。其戶口至五萬矣。若基圖則與利瑪相若矣。二者其始皆荒陋僻區也。若墨西哥都。近亦十餘萬戶。此以較其舊王孟特祖馬時。蓋五倍不啻也。西班牙之屬如是。至於英國之保斯敦奴約。非勒德爾。非亞則尤進也。未爲西班牙所併之初。南美諸國。若墨西哥。若秘魯。無馬牛以供服役。其地所前有者。獨豬耳。軀幹筋力。劣於亞洲之豬。耕無耒耜之制。民不知冶鑄。交易無泉幣。通功易事。皆以市易。掘地破塊。則用木缶。刀矢以礮石爲之。魚鱉以爲簋。獸草木皮以爲服。其俗純於野番。而謂其繁盛富庶。若既通之後。如今日者。所必無者矣。凡國戶口之蕃彫。必視資生之豐薄。而資生之豐薄。又必以能事之進退爲比例。此不易之例也。故雖西班牙力征其地。適用虔劉。而二國之民數。實今逾古遠。特舊種日稀而新種浸熾耳。

西班牙而外。殖民之舊。莫若波陀噶爾之巴西。始以其地之無金。國家所忽置者幾數十年。然以其忽置。外出之民。得以無擾。其地亦不劫而寢盛。當波陀噶爾臣屬西班牙時。荷蘭以舟師攻之。巴西共十四部。而荷蘭得其七。方欲全而有之。適是時波陀噶爾立布蘭汗查爲王。而叛西班牙。同仇合從。則置巴西之役。而波與荷中分之。麟而荷蘭虐波陀噶爾民。民群起毆之。盡復其故所關地。而巴西與今屬波陀噶爾焉。其民種最雜。而戶口約六十餘萬。此爲美屬殖民最廣者。

當十五稔之末年。降至十六稔之中葉。天下海權大者。獨波西二國。雖歐洲之商務。多屬溫匿斯。而其舟車出地中海。西班牙始以先至美洲也。則視其地爲已有。雖其力不足以制波陀噶爾。然巴西而外。餘國莫敢問津。其怖畏西班牙如此。法人常開步殖民於佛羅力達。西班牙知其事。則聚而殲之。而他國之覬覦遂絕。當是時英國有日興之機。十六稔之末。西班牙舉傾國最勝之海軍。號阿美達者來伐。以人謀之不臧。亦天幸之不相。彫敗殘毀。歸者寥寥。而其力遂不足專美洲而禁他人之分佔。

矣。迨十七世紀之初，英法荷蘭丹馬瑞典之民，凡其國襟海而有舟楫者，紛紛西出，各設步立邑於新洲云。

若瑞典之民，則設步於紐若西。至今世異時遷，其中尙存瑞典舊家，願其地當興，反至於見奪者，以故國輕棄其民於度外也。以故國之不加保護，故爲鄰封奴約荷蘭人之所吞併。至一千六百七十四年，乃悉入於英轄。

丹馬民據而有者，僅二小島耳。一曰聖安瑪，一曰聖克路支。當新洲設步之初，地與民多爲公司所掌轄。公司者，請於本國政府，專其地利，凡其利之所產，與其地之所銷，皆公司爲之轉運。國家取歲費於公司，往往甚微，而民則常爲公司所股削。夫立國之政體多端，有民主，有君主，有世家之主，有幕府之主，以公司治民者，則商賈之主也。商賈之主，於治制爲最下。新殖之地，往往用之。顧地利將興，雖用最下之治制，沮之不足，而使之勢緩力能有餘。輒近丹王盡去公司之政，新屬之興，沛然莫禦矣。荷蘭於東西兩印度，皆有外屬，其治亦始用專利之公司，故其勢雖進亦緩，而民力

罷。若蘇利南。若那哇比利遮。(後分爲奴約與紐若西)皆較他國之殖民。蔗田爲後矣。然而猶有進。蓋以地廣價廉。而民之來者氣新而志勇。雖以最下治。制臨之。其進盛之機自若也。又以去宗國極遠。雖有辜較。其開禁出入者。勢難盡祛。民乃不至於大困。近蘇利南公司以防之難。密乃約歲納百二十五貼費者。乃許貿易其地。獨阿非利加販奴之利。則猶專之。自此利開。其民大悅。數年以還。賄極盛矣。他若庫拉斜與優斯達斜二島。皆荷屬。而爲大通口岸。無論何國舟出入者。皆無稅。則自開通以來。幾於轉石田爲沃野矣。

法蘭西置外屬於剛納達。而亦治之以專利之公司。自密昔斯皮重田之舉不行。而剛納達公司亦未連俱廢。故其地始病而終休。英國吳爾福將軍建偉績成大名於此。而其地從此爲英屬。稽其戶口。則較二十五年哈勒哇所料計者。蓋倍之矣。哈勒哇者。天主耶穌會教士。自東徂西。徧履其地。著風土記。其所稱者。皆翔實可據。依也。聖多明戈者。科命波始至之小島也。其後爲法國群盜之所據。爲法令所不及者。將

數十年及其收之也亦緩其銜銀駁之不敢峻也當此之時其戶口國殖歲皆大增雖亦爲專利公司之所治而進機甚銳不爲病也至於公司政廢其進益不可遏西印羣島大抵蕪田而聖多明戈所產裏英屬諸島所總出者乃足當之可以見矣然法國新洲諸儲業大抵皆盛不僅聖多明戈一島而已

各國殖民新洲其進盛之略具如此至於吾英所屬比而論之其火然泉達之機未有如北美之神速而盛大者此其所由有二一也民得自由二也顧獨自其前者而觀之則吾英之地固次於波西二國之所有者而戰事未起彼法人之所據者固亦不調於英然則其神速盛大之所由必以政制之施有甚便於勞民之興業而民之趨功享實其自由而不被侵漁必大過於法波西三國之所蒙遠矣

則請列而論之一曰廣田自荒之禁雖不必盡嚴而行諸英屬者常嚴於他國蓋殖民新壤之律民之占地者限若干年月責其地之盡闢劃盡而萊汗如故者則他民占領之自此法立民雖不緣此而皆勤田雖不以此而盡治而十得其七八則所救

多矣。

二曰北美田制不用本國舊律而廢大宗傳長之制有田者死得以分贖諸子雖在長子不過倍之此摩西舊法也故即有占田過廣前法所不及治者得此救之不數十年其地仍析彼波西二邦外屬猶沿舊制地與爵俱不得分割外售法屬田制雖無大宗傳長之事得以分界諸子然有爵之家田雖已售至其子孫法得更贖是故貴人之地還轉尤難大抵新地之中地以轉售而析者多以傳繼而析者少前謂新地之所以易致興盛者良以田美而多今占田無限而分析綦難則其效與國中田貴而少者均興盛之機由斯失矣又國殖歲進者野邑並重而視野爲多其在新地倍於舊國故新地乍闢民之手足以用於農業者最爲有功租庸廩三皆由是出自廣封者多民之用力勢不得不舍農而趨他業而歲殖坐減此英屬之地其農功所以常奮而收利爲法波西三國所不及也

三曰英屬稅歛之薄夫其歲殖既豐而其稅歛又薄則民之積聚有餘而興業廣田

益易。蓋宗國戰守之費。與夫官祿王用之度支。從未嘗取供於外屬。而屬土守防之費。轉仰給於宗國者有之。故民所出以供上者。不外本藩設官理民之費而已。夫一國之度支。其取以資武備者。最爲煩重。而內治官祿次之。北美之民。於前費既已免矣。而所謂內治官祿者。又取足周事。不爲紛繁。是用其費益省。都護之歲祿。理官之廩餼。與夫游徼詰盜兵吏之月糧。益之以修飭道塗。浚治溝洫之不可闕者。法如是止矣。故北美之民。未爭自立之先。總其歲供。不逾六萬四千七百鎊之額。以其區區治方數千里三百萬之口。而裕如此。此真道國者所可取法者矣。竊嘗推原其由。蓋其守兵最鉅之費。既出於宗邦。而一切禮儀燕饗崇飾聲威之事。如都護之立。民會之開。雖不至於苟且。而未嘗甚華。即至教宗禮文。亦從其實。什一教賦。所未嘗聞。主教者無多。民量力鳩錢以養。未嘗有定制也。其歲費之所以廉在此。而賦歛之薄從之。至於波西二國之屬之事。則不然。彼方責利於其屬。以此爲強大之資。則其賦稅無由儉也。法蘭西本饒富之國。誠不必借力於外藩。顧其爲治。則一切務爲崇侈。以鎮

服其土人。蓋與波西二者之所爲等也。如秘魯都護新至。禮文隆重。費輒不訾。且不
 惟歲時之費而已。平居之豫。大奢侈稱之。而遠方之民力始瘁矣。蓋歛之於一時者。
 雖重猶可以蘇。而賦之爲常供者。愈不堪命也。且三國教宗。皆沿羅馬之舊。其節文
 尤繁。其官制亦密。什一之賦。算及百產。而行法嚴峻。正宗之外。又有苦行教徒。行丐
 自養。雖其事非法。所許爲第風俗既成。父教其子。夫詔其妻。皆以施予爲福田。以吝
 嗇爲罪業。無名之費。滋以益多。而教宗之人。乃廣積餘資。并兼田畝。民乃無所措手
 足矣。此其所以不逮於吾英也。

四曰銷產之場。英屬廣於他屬也。蓋諸國之於其屬也。常取其市而專之。藩民之產。
 必通之以本國之民。其所求於歐市者。亦必轉之以本國之商賈。他國商賈不得與
 也。顧其爲壟斷之事則同。而所以爲壟斷者則異。必分而著之。乃得晰也。
 則或以其屬之商利。付之宰較之公司者矣。如是者。藩民所欲得之外貨。必於公司
 焉。是取藩民所欲售之本產。又必於公司焉。是輸。夫公司者。特斤斤然於已之利否。

而已矣。屬之榮悴不遑計也。故有所售則必出之以至貴。有所取則必收之以至賤。不徒此也。使取之而日多。入歐之貨其價將日平。如是者又非公司之利也。則必限而取之。使運歐者供常劣求。而後可以長持其高價。彼非有恨於外屬之民而惡其地產之漸盛也。產盛而已之利衰。斯舉之而必以計尼之矣。是故國而欲其外屬之困敝者。計莫便於設辜較之公司。往者荷蘭嘗用之矣。繼而丹馬亦用之矣。至於今則皆窮而知變。法蘭西之於其屬也。公司之政時作時廢。與者獨波陀。噶爾於一千七百五十五年。從各國相率而廢其法之餘。乃猶用之於巴西。則難索其故者矣。則或以其屬之商利付之其國之專口者矣。如是者通商有定步。開駛有定時。假有非時獨往之舟。則必糾重費而後許。其與公司之政異者。其業通國之民皆可操。不辜較以人而辜較以地耳。雖然。既拘之以專地定。矣。則是利本而商者其勢必利於合而不利於爭。利於同而不利於異。既合而同其道。亦與辜較之公司等耳。辜較故其利皆厚而傷民。藩之所買者皆貴。所賣者皆賤。西班牙以此於其屬者也。西印

諸島之中。歐貨之痛騰。以此一磅之鐵至四便士。一磅之銅至九便士。他可推矣。夫通商之事。所取者既貴。其所與者必賤。此息則彼消。歐貨既昂如此。土物出口。賤如之矣。波陀噶爾之政。巴西而外。乃同於西班牙。而巴西所用乃尤微也。

則或以其屬之商利。付諸通國之民。不由專商。不拘專口者矣。如是者。雖其事未極於至公。然地散商賅。故其勢不便於爲合。而平均爲競。無壟不軌之贏利。無由取矣。卽其屬之民。亦可買賤而售貴。不若前者之困於合從也。自北美羣屬商利之興。吾英之私其地利者。僅如此。法國自密昔斯皮公司既散。所以待其屬藩者。同此。故二國本屬商利皆平。不爲藩民所病。蓋最公之政。以所屬之利。公之天下。其次公之一國。其次公之一口。其次專之以一公司。英法之所爲。雖尙非其最公。而方之餘國。要爲廉平。藩民受賜。固已多矣。

英屬之所產。其著令非本國不得運售者。載航海條例中。名曰冊貨。冊貨必銷諸本國。其非冊貨。民得運致他所運售之。然其載運舟船。猶必用英產。抑本屬者。其舟子

稅工全船人數四分之三必英人也。

北美產物其重要者多非冊貨。若穀麥（米不在內）若材木。若脯乾。若魚鱸。若餛。若蔗酒皆不冊者。其爲物如此。而事驗遂有可言者矣。

以穀麥不爲冊貨。而北美之田功以興。蓋新墾之地。必以生穀爲大宗。使列之冊貨。而銷場狹。病農之害。必立見也。自聽其運售。而田利多厚。斯野不督而自闢。戶不勸而自增。寢盛之機。實由於此。不可忽也。

以材木不爲冊貨。而榛穢之地日開。蓋新得之地。林木必多。深箐長藤。大爲農梗。其價甚賤。則斬伐之費不訾。烈而焚之。抑爲下策。自聽其廣售。斯化無利爲有利。易糜費爲省費。斧斤甫輟。鋤始加。此與不冊穀麥實相資爲用者也。

所由於不冊脯乾者。始造之國。戶口既微。而地之加犂者狹。則牛羊蓄息。勢必大過所需。而價爲之賤。顧其地牛羊牲畜之價。須與穀麥之價比例而起。夫而後田野有治闢之機。此吾於前書所反覆詳論者。自脯乾不爲冊貨。而隨地可售。則銷場拓而

牲畜利增。此又與前二條之美意相得益彰矣。雖然。自英王若耳治第三以皮革爲冊貨。而北美牛羊之價遂減也。

所由於不冊魚鱈者。英爲島國。以多舟船。民習走海。爲保國要圖。故無論本屬漁利。皆政府之所重。廣其銷場。厚其利資。所以勸之。當北美未爭自立之先。紐英倫漁業甲天下。不列顛三島之中。舊以獎政募民伐鯨而終無大效。而紐英倫伐鯨之業。民不待獎而自趨。其產銷於西班牙波陀噶爾泊地中海四周諸國。亦其地物產之一大宗也。

至於釐酒二物。先是釐本冊貨。至一千七百三十一年。北美釐戶以爲言。則貨舍之。顧雖不冊。而銷於本英者日多。所餘以波及諸國者至有限。釐市日盛。故雅墨嘉各島。蔗田亦日闢。二十年來。所增治爲不少矣。然其銷市終什九在英。而什一在諸國也。故釐之一貨。雖冊與不冊同。至於蔗酒。爲製釐餘業。而運銷阿非利加者。以此爲大宗。常以蔗酒往。而以黑奴還。業蔗之儲。大抵皆採皮之種矣。

向使北美所產若穀麥若脯乾若魚鱗皆著之爲冊貨而必於本英是售將至者日
漲而奪本英土貨之利故向於北美諸物或冊或不冊者非爲藩民計利否也防其
腐至使吾英土貨滯澀而已是以不冊之貨有運英者爲犯科也其立法之始固出
於私而美屬之民幸以利

不冊之貨宜可以運行諸國者也然亦牴牾不盡然如材木如稻稷其始皆冊貨繼
而置之而令所售必法蘭西以南諸國而後可此若耳治第三之令也俄而凡非冊
貨其運售皆循此例考所由然蓋因英爲製造之國而法以北民亦業製造其勢可
與英爭設屬與之通則運回之貨將使英民利奪至如波西以南則製造粗窳爲英
所不忌者矣

其所謂冊貨者有二一產於北美而爲吾英之所無者此如蔗錫加非椰醬菸菜楓
椒薑鯨鬚野蘭木棉鼈皮靛青染木之類是已一雖非北美專產而本英所銷多致
諸歐洲他國者此如造舟材木檣樑杆舳斲絮之柰松脂石油生鐵銅升（英產鐵

國而當時本產不足用如此可以觀今昔矣。一牛羊皮革、海藻之灰之類是已。蓋納前之貨雖多於英之本產，利無所奪，且其物既爲北美所獨產，各國所共資，致之於英，所以得居間之利。納後之貨雖非北美專產，而英產既不足於供，而時求於外矣。得此則可以奪諸國之利，而於英無損。第上下於權稅之間，固可使諸國之產貴於美屬之產，而美屬之產又貴於本英之所產也。此又言保商之術者，所以時進出之差，使之轉負爲正之一術矣。

既云不册材木矣，而獨册造船之材，此所謂多所抵牾者，使此令果行，於北美開山伐林之事，必生沮礙，而禦功以難。幸一千七百三年瑞典松泰公司於運英之貨，忽欲加價而限其額，於是英人大恐，議院謀所以抵制之者，則立獎政以勸北美之木商，銷市雖隘，而貨價則高，二者乘除，猶有所進，北美舉務乃不衰也。

其册生鐵使之由美運英也亦然，雖銷場坐蹙，而大減其入國之征，由餘國至者所不敢望也。山前之事，而北美之冶業減，山後之事，而北美之冶業增，夫治必資薪炭，

薪炭之費莫治若也。薪炭用廣，故林莽日祛，而可耕之地漸拓。凡此皆令行而新造之北美受其厚賜者也。雖然，制令之家，於北美之利害，不徒無概於其心，且亦智慮所弗及。制令者自適口事，而與北美之利偶有合耳。無所用其德怨者也。

商通而無一切之拘禁者，獨行於北美西印兩英屬之間耳。百貨暢流，無冊不冊之異，以故二屬皆休，互爲所產之銷市。民庶而財阜，通之爲效如此。若本英之於其屬，雖較他邦爲愈，而彼是之吟，未能盡祛。故所銷者多其地之生貨，卽有製造熟貨，皆最粗者而後納之。工業之民，力能使操國政柄者，加厚稅立關禁，以絕其精者之來。此固言商宗者之所爲也。

則試卽其所行之事而觀之。今如西印糖餉來英者，每百磅征六先令四便士。此平稅也。而白者則加至一鎊一先令一便士，已不倫矣。至於晶餉成錠者，乃至征四鎊二先令五便士有奇。此何爲者？夫使餉列爲冊貨，必售於英，而精者又設爲不倫之稅如此，無異使外屬之業餉者，必產其粗，勿爲其精。欲其精者必成於本英之製造。

此其所以爲壟斷也。由是英法所屬之地，皆有蔗田，爲法所有，則糖業興，轉爲英屬。則糖業廢，何則？法無此令故也。往者古，冷那達之屬法也，提煉之廠所在多有，及其入英，此廠隨閉。至於今日，此提糖者不過二區，以供本屬所銷而已。又若生鐵，亦冊貨也，減權納之，可謂優矣。而至鍊鋼拉機，則懸之厲禁，蓋此類熟貨，不徒禁其自製以運售，且本屬所用，亦必仰之於英而後可。大宗熟貨如此，至於冠履之工，蠶絲之業，亦立之條令，使諸部不得互供。舟漕車輓，犯者沒官，是使屬地之民，凡有熟貨，銷市既以不廣，分功因之不繁，生事所需，終於劣苦，政之不中，而皆誦宗計學保商一言致之耳。

民各具其勢力，地各有其土宜，成群地著之後，有特居上之權勢，或強弱之不齊，奪其自然之利，使不得盡其智力，裁成土宜，以用享交通者，此其爲滅理背天之尤。而賊斯民天職者，不待論矣。顧英民雖待其屬如是，而北美終克有立者，則亦有故。蓋北美地廣腴，動植繁富，百餘年來，尙爲新國，地賤而易有，民稀而工貴，彼方爲治

關新例之不暇。固未遑及。精者之熟貨也。是故凡有所需。轉不若以其生貨。易之於英。歐之爲便。則雖不立之禁。彼將自不爲之。故禁亦於彼無害。顧禁設則北美之民。權奪。而以內附爲羞。況所禁無理。徒快本國工商妬媚之私。於國計固無補也。繼今數十年。北美之治益進。此禁不獨大害見矣。

北美之冊貨。吾英既德而有之。則入國之時。常減其稅。以相報。他國至者。物同而稅之高下懸。其商利遜之矣。有欲得之貨。或立獎令。以勸其來。蒙減稅者。若糖。若菸葉。若鐵。至而得獎者。若野蘭。若麻。臭。若龍青。若木材。若凡海舶之所用。夫以獎招所屬之商。此其政獨英行之。他國則否。他國所以待其屬者。獨減權耳。若波陀。噶爾。則爲禁他國同業之商。使專其事。此則吾英所未嘗爲者矣。

藩民之用歐貨。必轉於英。然亦有所繼貨。不若他國待其屬者之苛也。舊法英買致貨他邦。若以復出。則聖還舊納之稅。所以利行也。至於藩屬。法既必轉之於英。雖不盤還。當無不可。而英人不爲。此藩民之利也。故歐貨之行北美者。往往較在本英爲

廉獨至英王若耳治第三時始令不掣助餉舊征之稅而酒布絺絺之倫猶全掣之英與屬通定其章程條例者多一時之商賈故爲商利計者有餘爲國與屬之公利計者不足彼既取其地所銷之歐貨而專其市有所販運又必無損於其在英所治之業者而後爲之雖美屬地產之利由此而豐不暇顧也歐亞之貨轉英而入美者皆有掣還掣還則無稅而本英之產則稅之此於本國又有損而議者亦不暇念也是此令行英之關稅既減而製造之產行於其屬者轉不若他國之本輕而易行爲法如此可謂值矣英國麻布之業頻歲以來不能甚盛者正以其行於北美者不若德產之易銷也

顧英之刻鵠其屬者止於通商已耳一時商宗之說大行各國所爲莫不如此有求不爲風氣所移而不得者至於他政之施固後游平公而爲各國所遠不逮者矣美屬之民與本國之齊民尚得公舉議員若英議院官取於民必經公諾否則角尖之賦不得加自家家強宗以至舉濫小民苟不犯法自統制以下文若理官武若鎮將

無所畏也。議會之制。略仿本英之民院。而尤平均。行法之吏。祿廩優厚。姦無由生。有制度局。主議法行制。若本英之爵院。其國新造。不以武功。無勳貴巨子。而局員之選。以賢。制度局員。皆議會所推舉。本英不除授也。國無世家。即有名門舊族。亦不過爲鄉里所敬慕。而無特優之權勢。獨享之利實也。故貴賤相安。而民氣和輯。其議會所得爲者。不僅議立法度而已。行法之權。亦大半屬之。英國政體。向分立憲。行法爲二。大綱君主兩議院立憲者也。國有所興革。議而行之。若各部諸司。則行法者而君主亦爲行法之魁。一其在亢攝提噶及洛德島。民得自立統制。英亦不加遙制。故美屬政體。擬之宗邦。於民主之制。爲尤近。民習於自治。稍加束涇。謬矣。此所以有近日之不靖也。

西班牙波陀噶爾法蘭西三者之於所屬也。皆用君權獨主之舊制。統會部魁皆國王之所除授。地遠而國新造。則假之以便宜。貪貪多。廉貪寡。而屬國之民始病矣。從古君權獨制之國。其民皆居京國者多行。而處鄙遠者多病。蓋君王以一國爲私富。

無所樂於魚肉小民。而變置枉直也。箠殺之下。咫尺君門。雖有尊官。乃無隆勢。而鄙遠不然。方且謂非假威權。不足鎮撫。窮殄呼愁。大君不聞。長吏貪猾。罰不時至此。其所以病也。自美利堅爲諸國分據殖民。以還。國部去都遠遼。爲亘古所無。藩民樂利。有以自遂其生者。獨英國耳。至於法國。雖緣沿勒制。而法令纖悉。足以防奸。其治雖不逮吾英。而勝於波西二國者。邇乎遠矣。

政術之善否。民生進而愈可知。今如西印蔗田。英法二屬之盛。不相遠。以英之政。平民有自由之樂。其不能遠過法屬者。本國儲業專利害之也。又法人善馭黑奴。蔗田皆資黑奴之用。如牛馬然。地當赤道。陽威酷烈。矢背流汗之苦。白人所不能也。殺田欲其利之充。觀牧豎田畜之良否。蔗田欲其收之厚。亦觀所以馭黑奴者爲差。英律誠不必殘虐黑奴。然有保惠之政。以田主之過於自由。往往釋不下究。地方官吏保護黑奴。不令過於凌轢。過者則取其主而彈治之。而主者或爲其部之議員。或爲其地之巨室。官吏之勢。乃望不行。而奴之受虐如故。法之官吏皆王所遣。於豪民長者。

無所忌也。雖家門產業之事。官欲過問。豈不可者。民之自由。坐是以減。而黑奴之困。又緣此而蘇。民知其奴之不可虐用。則待之多寬。樂於寬假。奴之爲主。亦加忠謹。悲詰。而田功日善。故主權彌張。其待奴彌虐。待奴彌虐。其田事彌劣。主勢稍屈。其待奴以祥。待奴能祥。其田利亦厚。此蔗業之所以英不及法也。

君主之國。其民之待奴婢常忽。民主之國。其民之待奴婢轉苛。此自古皆然。所考諸傳記而可證者也。卽如羅馬史載。威得波利以其奴之少忤。令磔之。棄其屍於沼。以飼魚。事爲沃古斯達所聞。則大怒。責其卽縱前奴。且悉放其家僮婢爲平人。此見諸羅馬君主之世者也。當其未改政制。號公產民主時。卽有此事。主奴分重。固可爲所欲爲。縱極殘忍。更不得過而問之矣。

案國旣爲民主矣。則人類平等。有雇役而無奴虜。而後其義始純。無抵牾之弊。設有奴婢。則民以貴賤爲差。而轉相隸。必統於一尊。爲君主而後可也。故嘗謂古無民主。若希臘若羅馬之舊制。乃以權力之均。不相統屬。不得已聚族而爲之。此謂

一譯書院印
合衆可謂之民主不可何則以其有奴婢故也又以知民主之制乃民智最深民德最優時事且既爲民主亦無轉爲君主之勢由君主轉爲民主可由民主而轉爲君主不可其轉爲君主者皆合衆非眞民主也（又最與民主背馳者莫若兵制故當戰伐紛紜國有額兵動數十萬者亦無眞民主之治）

法屬蔗業之優於英屬者其效又徵諸用本之異而見之若聖多明戈諸所法之蔗利大抵歲有贏餘以其有餘所開益廣故法產之增皆其民力之所自爲至於吾英之蔗業不然有所增治其母皆鳩諸本國其以餘利增脩者蓋亦寡矣故英屬蔗業之盛非其屬之所自致惟以宗國之富厚溢而爲之以比法屬之以餘利拓業者不可同日而語矣然則法屬蔗業必有其勝英者夫而後有此驗也自我觀之則坐所以用田奴者善耳

歐洲諸國之所有事於其屬者具如此設總其始末而觀之則歐之所得自詡者亦至少耳不獨締造之不足言也即其後日之轉盛亦豈其所致也哉歐人之事北美

也。奮其愚而行其貪而已。蓄心於黃白之二礦。行強暴於其土人。土人於白人未嘗害也。方其始之待外人也。未嘗不以恩。而白人則奪其地而有之。欺其弱而盜其產。此真無行義之尤者耳。何足道。且即自歐民之適彼而言之。溯所由然。亦未爲吾歐之美也。夫剝猾之民。結黨嘯群。專浮海以逐利貨者。微論已。外此則大抵以避地避人往也。紐英倫之質。由於票利丹。一當明季國初之際。英法民奉耶穌教。獨嚴謹言。行必依新舊約者。號票利丹。票利丹譯言淨土。一居國中而不容。則相率西徙。而創四府於其地矣。羅馬舊教之民。與新教者若冰炭。則避之以適馬理蘭矣。一當時英女王馬理守舊教。故來美者以名其地。蘭言地也。一他若括開斯者。一括開斯者亦教宗之小派。譯言戰栗之人。蓋以其常自言戰栗事上帝也。一則往彭斯爾花尼亞矣。凡此皆英民適美者也。波陀嗎爾之猶太種人。以異教故。覆其家亡其產。而竄其身於巴西。於彼而教民蔗耕。游手罪民。始有所附而業焉。是故美洲新壤之實。非實於民上者之前。誠早計。爲其益國利民者也。實於暴政汚君。淵魚叢爵而已矣。

其開之之事既如此其成之之事又何如。質以云乎。亦因事會之偶然。均之無足道也。墨西哥之取也。其策不發於西班牙之政府。而發於古巴之島商。其事倡於繇銳之無賴子。後雖欲反其議而無由也。他若秘魯若智利若餘國。大抵皆喜事逐利者。自爲之。成則其名歸於國家。而敗無與焉。西班牙如是。他國亦莫不如是也。南美然。北美亦大抵然也。印度之爲英屬。亦始於專利公司之自爲。其後克來福練士兵以戰法人奪其地而盡有之。英之盛自此始也。及其既成而實矣。則國家爲著交通之條令章程焉。則又含專利之外無餘策也。所以抑之者有餘。如曰輔相導揚。竊恐未嘗有也。專利之術。國各不同。即英之稱平恕者。亦此善於彼而已。無所謂良法美政者也。甲申越南之事。亦法國無賴福祿諸之所爲。豈其政府而政府從之。一然則歐之於美。獨無所可言者耶。新國百年之間。浸盛浸熾如此。未通之先。美國未嘗自致於是也。苟自其一端而言之。歐之有造於美者。固甚大也。則人才是已。惟歐爲有才。而美得之。其草昧以開。舍此而外。美國無所得於歐也。

以下論美洲既通印度海道亦達歐洲因之所獲之大利

美洲所受於歐之利益如此而歐之所受益於美者亦有一焉有自一洲所獲之公益言之者有自殖民諸國所獲之私利言之者自一洲之公益而言之享實一也發業二也何謂享實南北二美動植五金殊材異品不可究殫自其地通歐之人坐而致之或以資生或以利用或以致飾用宏而享奢先是不能得也何爲發業物不虛至必有與易以其享實之多故出以與易者亦夥與易者夥必民業益盛而後能且此不僅見諸徑與爲易之諸國也若西班牙波陀噶爾法蘭西英倫無論已即不與美徑易而轉之於是四國者若伏蘭德若奧地利若日耳曼凡美產之所至其民之業亦以興麻桌諸業是已故自美通而歐洲產物之銷場皆廣銷場既廣雖欲求民業之不奮有不能者矣

至何噶利波蘭諸國其所產之物未嘗一至美洲則民業盛衰宜若無與於美之通塞者然自其國於美產之餉菸椰醬皆納而銷之有其入者則固必有其出者雖不

必徑入於美而必入於爲美轉輸之國而後饋於椰醬可得而來也是句噶利波蘭有產而饋於椰醬爲之價值而後有其交易之事凡此皆美洲未通之初所未嘗有者也交易降繁而物價以起價起而民業殷故雖無所致於美而得美之益自若然此雖無所致於美猶有所受於美特迂回而後通耳國固有無所致於美且無所受於美而受美通之利者但使其國與通美者通通美者商市既廣矣民業既殷矣以其國之加富出以他易者多而是國與之爲市則其蓄有之產價值將增價增則民之致是產者奮而歲殖坐廣焉是其利亦緣美通而後有也夫何必有所致於美亦何必有所受於美乎此猶水矣一川受漲百支皆盈國之脈絡互通有如是者不必徑爲交易也

是故使殖民之地通商必限於本國者其享實發業二者皆微此不獨各國受其損也而殖民地之所損尤深猶浚川而堙其源省機而錮其括凡宜行者皆不行而宜動者舉不動矣蓋通屬之利既爲本國之所專其產之銷於餘國者自貴則其銷

狹銷狹則屬之民業不替而諸國享實發業之利舉微享實微者其物價貴也發業微者其收利薄也且通屬之利既爲本國之所專矣各國之產致諸是屬者其價亦昂昂則其銷狹狹故各國之民業減而屬地之享實發業舉微然則一國行其專利之私其害徧及於諸國而殖民地之所損尤深也彼距諸國令不得分其屬之專利而令其屬必與一本國爲通夫禁一國而通其餘與禁其餘而通一國者其商業之廣狹大有閒矣雖然一新壞之通利之所以大者以其物產之目審而出以爲通者衆也故得一美可以餉諸歐自專利之術行其產之宜審者且大減即專其利者終之亦曷嘗利乎此所謂小智大愚者也

開通美洲之利自全歐之公者言之如此而自殖民之國之私者言之則亦有二焉屬地之所同者一也美利堅之所獨者二也國之大者皆有其屬或省或部或藩皆有其當脩之職供故自其同者而言之則美屬之於人國也猶之一省一部而已自其所獨者言之則諸國殖民於此固各有其利焉請先其所同者

屬之通融兵役也財賦也兵役所以爲藩衛財賦所以爲詔祿古者羅馬外藩二者或兼之或取一焉而希臘之殖民地宗國有外侮則出兵以助之至歲幣之供從未嘗有蓋其民外徙常爲自立之國宗邦不得視以爲屬而臨制控馭之也故無事則爲友邦急難則相赴無君臣主屬之分可以相資治也

北美之於歐雖號爲屬國而遣兵藩衛本國之事未之嘗聞蓋勢不可也萊汗摩爾戶口漸寡即有民兵以之自衛數且不足至於有事不特無所遣發且以屬壤單外之故敵所覬覦宗邦兵力常以兼顧而分故晚歐諸國徒以兵力而論方以多古外屬而弱不以廣有新地而強也

案斯密氏此說在當時已然而至今尙爾海軍陸師侵耗民力之尤大者顧英德諸國急不敢暇者亦坐屬境多耳英得印度之初戰守之費以京埃溝澗計即其他如南極之澳洲如南非之好望角如北美之剛那達以財賦兵役言於本國均爲有損光緒初年俄土之戰英得地中海之東極喬島名塞布刺斯者至今以爲

索斯賓塞爾言。國家常以辟拓疆土爲事。然得一無益之地。虛本國之財力以守之。則於國常有損失。之又大墮威名。則何異引磨之驢以石自纏其項耶。然而至今英德俄法諸國。猶斷斷於非亞澳三洲之殖民地。不惜爲出兵力以守且爭之者。非曰國家財賦兵役有所利也。實以得之則人民有所殖。物產有所銷。此其所以不惜大張海陸之兵以力持之之故也。中國地大物博。稅薄而民勤。歐洲與之互市。有其全利。無其少費。此所爲操萬全之算者。近者英人貝勒斯福遊華。歸而著說。主大開門戶之議。而黜瓜分之議。彼固計利而動。夫豈有愛於我也哉。

藩屬以財賦豐佐宗邦。稍資文理武備之用者。獨西班牙波陀噶爾二國之屬有之。餘國所收於其屬者。平時已不敷費。戰爭則尤不供。吾英之屬尤甚。故國有外屬。常耗國財。欲以裒益度支。未嘗有也。

故自屬地之所同者言之。開美爲屬。未見其於吾歐有所益也。第自美屬之所獨具者言之。則其利誠不可以一二盡也。蓋諸國之樂有屬也。意在專其權利而已。彼以

謂專其商利。則本國享實發業二者之事皆進。享實進者。其冊貨非轉於本國。則不得銷餘國。求冊貨者必由於本國。如是則本國取之以廉。各國取之以貴。此事實之事。優於各國也。發業進者。取彼之貨既廉。則與彼之貨必貴。各國所不能也。如是則以本國熟貨。易屬之生貨。本國則出少而易多。各國則與多而取少。故熟貨價善。價善故其業奮。此發業之事。優於各國也。

雖然。彼所謂利本國者。非真利也。特相形而利耳。有與其鄰比廬而居者。欲其所居之高。塏。則汙其鄰之址。以形其高。此非真能爲高也。大水時至。無救於淪沒。專其屬之市。以他國之薄爲己之厚者。非能使享實發業之利。真有所進也。特抑他國之利。以形其進耳。如英屬馬理蘭及威占尼亞二部之菸葉。英全壟斷之矣。由英而後波及法。則菸之價固在英廉。而在法貴。雖然。此特相形見廉。而非真廉也。向使英於前二部者。縱各國公享其利。而未嘗設爲專市之禁。則馬與威之菸葉。其銷場數倍加廣。銷場廣則其產菸之業。必奮而加多。多則其利與耕平。與耕平則其價乃大賤。當

此之時英之熟貨所出以與馬若威爲易者其所得之款必過於今數倍不啻然則使無專市之禁享實發業二者英與各國將同時而皆優英之商利必大於今可決也顧英欲獨進於此則不能也欲進於此必自均之各國始所收之款固可以至廉所出之熟貨亦可以至貴而欲廉於他國之得於貴於他國之售貨則求其果而先破其因必不得矣蓋真利者公利公私固不兩立也

案斯密氏此論實能窺天道之全蓋未有不自損而能損人者亦未有徒益人而無益於己者此人道絕大公例也公例之行常信於大且遠者自其小且近者而徵之則或隱而不見因緣滋繁難以悉察故也而公例之行實自若常人信道不篤則常取小近者以爲徵此何異見輕毳之升而疑萬物親地之理與通吸力之公例爲不信乎嗟乎使公而後利之例不行則人類滅久而天演終於至治之說舉無當矣斯密氏之論豈止爲商務一端發哉

以其欲得相形之利故其專己也惟恐不爲而距人也惟恐不深而吾英之於其屬

也由此而可收之真利失矣。且豈徒失其屬之真利而已。其本國向所已興之商業。所前開之利源。由此而真損者有之。由此而相形見損者亦有之。

蓋自英專其屬之商利也。餘國之母本。用於北美商業者。不得不收。自餘國之母收。則英人母財。前所以事其地商業之一分者。乃今以事其全。凡轉歐之貨。以給美屬。運美之產。以銷歐洲者。皆出於英民之母本。業廣於前。而母均在昔。則歐貨之售於彼者。其價不得不昂。而美貨之見收於英者。其價不能不賤。收之者賤而售之者昂。其贏率固增大矣。此業之贏率獨盈。餘業之贏率自絀。夫用本者固舍絀而求盈。則英之母財。爭趨於北美商業者。勢也。且母財聚則商競深。此業之商競獨深。餘業之商競自淺。淺深之際。互爲其根。而通行之贏率。因之而異。數除之後。起而察之。後之贏率。固進於往者之贏率也。

是故自航海條例之興。其效見商業者二。母財偏趨。一。做業虛。一也。贏率漸變。古微今鉅二也。是二者。不僅見於此例。初行之一時。例一日行。母財一日改趨。贏率一日

有變也。

則自母財偏趨而言之。航海條例既立以還。吾英三島之中。國財固爲大進。顧以此例言之。終未若美屬之潮長川增也。夫國財進則歲殖豐。歲殖豐則盈餘廣。盈餘廣則出以爲通商互市者多。今吾英既取其屬日盛之商業而專之。而其民所斥之母財。其加者不猝與其業之廣狹相副。則母財之由餘業而移注者。勢必日多。而餘業所受之母財。勢必日寡。故自航海條例行。英屬之商業日繁。其他所之商業。前與歐洲諸國通者。日蕭索矣。英之工業。前所治辦者。大抵所以行鄰封與地中海諸國者也。至於今則舍近圖遠。皆所以行北美。北美有率較之利。而歐洲無之故也。曩者計家德瑪寶以吾英商業之隆衰。由於賦稅之無蘇。民功之日貴。風俗之日奢。不知此數者皆本於美屬商業大盛之故。蓋不列顛之母財。所以濟商業者。未嘗不鉅。而無如屬地商業之日長。其速率過之。過故不得不資挹注於餘業。挹注既深。則餘業有日退而不能者矣。

今夫英固莫大商國也。其積貯甚多。其斥母極廣。此自未有美屬而已然。及既有美屬。猶日進。往者戈洛慕爾監國。則有荷蘭海戰之役。當是時。英之舟師固較荷蘭爲勦矣。即至察理第二之代。亦以一英敵荷法之合從而有餘。知吾英海權之張。必非航海條例之所致矣。當彼之時。北美始通商業。僅芽孽耳。若雅墨加。則號痘島。人所畏忌者也。若奴約。若紐若西。則荷蘭之屬壤也。若安直瓜。若葛羅利納。若彭斯爾花。尼亞若佐芝亞。若那哇斯各地亞。則皆極榛未闢之荒地也。其闢而耕者。獨馬理蘭與威占尼亞及紐英倫而已。是三者雖甚興發。而謂此數十稔之間。其戶口財賦教化能自進於今者。歐美之人始顧所不及者也。然則英之富強。味者以爲基於美屬之專利。此不待辨而知其非矣。雖然。其富強必有由。不由於美屬。則由於諸歐之互市。便向者歐市商業。其蕭索已如今。則舟師之盛。何由致。以此知吾英本歐之商業。其先已宏。其所以古盛今衰者。實由專利於美屬之故。向使得美之市而公之於人。則本歐商業不至降微而益得於美者。無論優絀之云何。皆爲增多而長進者。孰與

今日之事得之於美者實皆失之於歐者耶故專利美屬之政於吾英利源謂之有所轉移可謂之有所增進不可也

更自贏率漸變而言之自英專美屬之市不徒斥母本以治美屬之商業者其贏率大也而餘業之贏率舉大蓋商業之道不及於平流者不止故通行之贏率皆進也且自專利之術行英母之注於美屬者雖日形其多而一國之財不敵衆國自美屬言之失諸國之母而獨得英其治業之母固見少也母少而商競淺故贏率以之高此見於美屬者也以其有所偏趨母虛而商競亦淺故贏率亦日高此見諸本英商業者也故自專利術行無論吾英積貯之何如其贏率皆有日高之勢今夫國之進富者庸宜進而應宜微英進富國也而贏率乃不微而反進者則專利之令爲之也乃今而所云真損與相形而損者可以見矣蓋設爲專利之令而母財偏趨自母財偏趨而贏率降大贏率大矣則民爲商業必得其專利者而後可爲其不能專利者斯二者之損皆見矣其所真損者吾商具貨入市求通行之贏率而不能能者必售

之以貴價。轉外國之貨以入英者如是。行本英之貨於外國者亦如是也。統一國而課之。其所售者貴矣。其所收者亦貴。於是所售者少。而所收者亦少。則享實發業二者皆微。此所謂真損者也。其相形而損者。吾有真損。而他國無之。如是則齊之勝我者。今彌勝我。舊之劣我者。今乃及我。享實發業二者在彼皆優。彼之所售。以其廉我。奪吾市而裕如。沒假而吾之物且不至。此所謂相形而損者也。夫專利者。所以優己而細人者也。顧其效乃以優人而細己。向之以是爲長算者。特未之思耳。

吾英商賈見其貨之本值貴。不利爲競。而市利常爲他國之所奪。則憾其工庸之大而贏率之大。置弗言也。此所謂有見於人無見於己者。夫熟貨本值之高。由於工庸之大者常少。而由於取贏之厚者常多也。

故自美屬之商務興。他所商業什八九皆彫敝者。由母本日減耳。減於自收以就美之新業者有之。爲他國之商之所排而不得不收者亦有之。趨其專利則棄其不專利者。此歐洲大陸與地中海之周。英貨之所以日索也。

美屬之商利日厚。移母營業者日多。歐洲商利日形其微。而英之母財祇有此數。益於美者損於歐。此自收而減者也。英之通行贏率。高而各國無此。則凡非英人專利者。餘國之貨。常有以傾吾市。則雖欲勿收其母而不能。此收於見排而減者也。向使美屬無專利之政。將英之母本用於歐市者如故。而美屬之利皆所增。如此而謂之長進可也。乃今則英之母棄歐而從美。而他國之母自美之禁而不得用也。亦舍美而實歐。英以有專利而贏率日大。各國以無專利而贏率猶微。二者交行於吾英之商業。此相形之損。所以日深也。

其不知者。將謂商業之所祈需者。贏得之多也。今美屬商業用專利。而母財之贏率以進。是美屬商務利吾英也。商之爲事。逐利資耳。違其贏率之少。就其贏率之多。商之逐利固然。民利斯國利。專利之政。實以致之。專利曷嘗病吾國乎。

今夫國之母財。果何如用而後爲最利乎。自一國而籌之。必其所發之業至多。所享之實至厚。必使其地利民力所歲登者。由此而益宏。夫而後有富國之實也。通商之

事母財之用其所贖民功之廣狹以復母之疏數爲差今假有千鎊之母而用之於內外之通商期之周年其母始復則國中所贖之民功歲受千鎊之益者也又使一年之中而其本再復三復其國中所贖之民功倍之三之者也則商同業而母財同數者於國之利有大小焉必以復母之疏數爲斷矣是故與遠者通不若近者鄰者而業之紆者不若其徑者今自美屬專利之政行民之用母也反是方舍近而圖遠去徑而從紆其事之果利國否不待論矣

則自其舍近圖遠者而究言之夫母財之用其利於一國者在於速復而信方其收之於本歐之商業而以之經營於美也其復於主人者常遲而難期此不獨道遠使之然也亦以新闢之壤不同歐亞舊邦之故蓋殖民新壤所最乏而最亟者常在母財業之可興而利者至多而本屬之積貯常苦其微故以母財爲貨則常供少而求多其勢必仰給於宗國百万舉貢而常負其通且新闢舉貢之術與本國之事有不同者本國置質於富者之家約息而舉之新闢所爲則緩其所與通貨者之通而留

以爲母故貨出於英歲盡可責之償常不過三分之一全母之復延緩至於四五稔者有之其速者亦不在三歲以下也如是則千鎊之母其所爲贖功發業之用而爲勞民之所資者固等於歲二百鎊而已何則其每歲之所復所得散以爲勸功發業之用者止於十之二故也夫通負緩償於斥母者未嘗無所損也雖所售貨價之極高有過期應責之息利與更約展期之中儉如此之利合而計之以補所失於緩償者常有餘然而母財之家所前失者則既復矣而國與民之所失者未由復也故國有母財用於還復之業者主人之利可以甚優而通國之利必有所損贖功者微而地利與民力之所登者舉以不進故也北美西印之商業其母之復不僅常遠久也且常無定而難期以比歐之商業相懸遠矣

則更自其舍徑從紆者而窮極之美屬之冊貨其至於英市者皆大過於英之所歲銷故其勢不得不更出之以售於他國英之母財遂不得不舍通商之徑者而從通商之紆者矣今如馬理蘭威占尼亞二部之菸葉其歲至於英者率九萬六千莖首

而三島之所能盡者不過萬四千鎊首而已其八萬二千鎊首有餘之菸葉必致諸法荷與地中海各國而後利生焉然則英之母財所歲用以轉此溢收之菸葉以易貨若銀於法荷與地中海諸國者其所從皆紆而不徑矣或謂商業順利何如耳苟紆而利何必徑爲不知課一業之利否固當從一國而言之紆之通商利於商者或有之矣自一國言則固害也若前事計其母財之何時復則待復於美者又益之以待復於諸國者而後可也待於美者已不下三四稔矣所待復於諸國者以一稔言則全母之復於英非五稔而遙固不可也美業千鎊之用其鼓養勞民不過均於二百矣則益以諸國之爲紆其勸功發業之用又下於彼可知也向使馬若威之菸不列於册貨而縱各國之轉輸則菸之來英者其數不能遠過於所銷而英致各國之貨將不以菸而以熟貨則英之登產也必相歐美諸市之所利銷者而爲之必不若今之專爲美產而置餘市於不事使之坐蕭索矣今者吾英之通商固爲一紆而置其諸徑使不專利則將廣於衆徑而狹於一紆徑之業多則母復易而有恆母復易

而有恆其數雖劣於今之所施而所以贈一國之民功治一國之地產者固將進於今日況不劣而且加多也耶如是則英之母財常處於有餘以其有餘因之發業以治地可也以廣製造可也以拓商業又可也夫母財降多則贏率自減贏率減則致貨廢廢則入歐市也勢莫能與之爭而常執兩國之牛耳孰與今日之事棄歐從美而常相形見拙也哉

專利之政使英之母財舍近圖遠去徑從紆矣猶不止此則又使經商者舍內外互通之中策而漸遂純行國外之捐商也夫然則母財之用其贈功發業之利歸於英民者愈微散而之他國者愈衆即如北美菸葉吾英籠而收之銷而不盡者至於八萬二千餘首乃出以與歐之他邦爲易然而所易者英又不能盡也則又轉之於屬地銷焉此如日耳曼荷蘭之麻貨是已英之業此者大抵皆捐商也其出以轉此菸葉麻貨者所有益於英之民力地利者至微而蒙其實利者美之種菸日耳曼與荷蘭之績麻者耳

今夫一國之民之爲工商也其勢常宜於分而不利於聚務爲其難還均平而病其專一獨重蓋分而難則雖世變猝乘其事常有以相救專而聚者不幸有梗舉國皆發矣此其所以危也且欲其分而難者初無待操政柄者以衛致之也任物情之自然則一國民業常如此若山分而聚山難而一則十八九皆操柄者之所爲也吾英之於其屬也使不感於專市之利而任各國之交通則英之商業不以軒輊易趨必無舍歐從美之局自設爲專市而利塗之難易厚薄判焉本歐之商業始寥落而不均之局破矣於是母財之用乃違其衆小道而注於一大支雖有舍近圖遠去徑從紆降通商中業而爲愈下之捐商種種之弊而人各顧私雖病國不知卹也其專且聚如此其工商之局乃難固而易危其民氣政謀亦常蹙而不暢方今之勢如人身之病微應一派盛漲而餘部之經首皆虛身慮無聊舉山此起其血未嘗不多也其氣未嘗不盛也而轉不若常人之安帖者孤脈憤興一有塞絕大命將遘故也通國工商之業每本之用既以法驅之使趣於一塗萬一有梗民且狼顧頃者西方之欲

自絕已見告矣。國民開命，疑饋背忘。雖往者西班牙之海旅來瀕，法蘭西之傾國見伐，都邑之中未嘗有此象也。蓋至是而專市之失策見矣。假令西道之梗，僅以數年。吾商將以焚舟。吾工將以破器，而枵腹群僮皆爲難矣。徒登於一時之近利，而不知棄此適彼，實無利之可收。俟使一塗偏勝，擁腫無倫。且國之大命懸其通塞，則不通計學之士豈可預人財政也哉。嗚乎，可以鑒矣。

顧居今而徒咎既往，豈昨非無益也。道在補救已然，消弭未然而已。而補救消弭之術當如何。曰：取專市之令而罷之，使之大通而無阻，得此則英民之母本雖欲無收之，而他用不能收之於西而益之於東，抑之於美者，即所以蔽之就歐，浸假而民之役財興業，自趨於平，而無所偏競。蓋欲其與一國之地利民材相劑，邦交之形勢相謀，有其利而無其害者，無他，因任自然，不加束縛騷擾而已。其利川自由以開之，亦即用自由以永之，舍是無長策也。雖然，猶有患。弛專市之禁，縱各國交午於吾屬之中，於舊有之商民，且大不便。其一時之不便，尚可忍也。誠恐有不可復之沈失，則若

之何。今且無言其他。即如前者裝運八萬莖首有餘之海船。舉將無用而坐廢。此不可謂非大損矣。故商宗計家之爲政。其害政之深。即在於此等。不獨行之而國受其敝也。欲爲補救。往往大難。聽之則其禍日深。革之則其憂立見。然則前者之政。其革除固不可緩也。而先後疾徐之間。重輕趨避之際。宜如何出之。而後國蒙其利。而民不至於不堪。則在當國之權衡。而非吾所得詳論者矣。

案斯密氏著論之頃。即北美自立國事紛紜之時。故情重言長如此。至云專利之政。不可不革。而革之不能無大損。則其言誠有過慮者。自事後觀之。斯密氏之言。固無驗也。英國財政。凡變革商宗學者之所爲。皆大利而無少害。此亦前人始計所不及者也。蓋工商民業之中。國家去一禁制。市廛增一鼓舞之神。雖有不便。特見於一偏一隅。而民氣之所發舒。新業之所導啓。爲利至衆。憤之不止於有餘。且轉移至連前之不便。瞬息無所。叔季之國。敝政多有。民坐守其利。謂改革則奪所安享者。故常出死力與更張者爲難。迨其既行。人人皆利。則亦自失。故曰可與樂

成難與康始。又曰非常之原。黎民所懼。由來舊矣。

頃者北美自立議行。十二部之民。群起告絕於英。英之失其專市之利者。餘一年矣。事起倉猝之間。非國人豫計之所及。則於吾工商二業之民。最病。顧其害若泯然。不見於國中者。非真通商之廣遠。而前者之存亡。爲無足數也。適有天幸。救敝扶傾。與相乘除。乃不覺耳。此其事有五。可歷指而見者也。一。未事之先。彼民知英貨之將絕。則籠諸貨。幾盡所有也。二。荷蘭與北地諸貨。往與吾英爭市者。適爲西班牙之所收也。三。俄土二國息爭。英之物產大通。銷場乍闊也。四。那威瑞典丹馬芬蘭諸北部。英市日增。近歲尤盛也。五。波蘭往日自封。又以國貧。不納外貨。比經瓜分。內亂亦救。母財輻湊。百產川流也。此五者。獨北部英市日闢。爲可常之利。其餘皆偶而暫者耳。而北美專利之失。則永不可復者也。以暫救常。慮不相及。然得此終殺其突來之威。而英國役財興業之家。得及時謀。所以趨避者。則北美雖失。其於英終不至甚病可也。是故自吾術而言之。取外屬而專其市利。不獨使吾國役財逐利之民。意有所偏重。

也其勢且使民舍近而圖遠去徑而從紆置本國與他國之交通而趨爲他人轉貨之捐業統此四端終於一損一損云何國之母財其贍功發業日由多而趨少耳且民業既偏於其屬而餘國之市以利薄而置之矣則其國之工業必舍其備有而趨於孤行商之役財必違其不傾而瀕於易危凡此皆爲國理財者之所忌也而貪近見小者不知之今夫國有外屬以之殖民則有益於過庶以之通貨則有益於進富固莫大之利也乃以貪專利之私而叢弊以起豈不惜哉

雖然國有新屬其所開之利源甚鉅專利之弊有以損之而其利國自若向使因任自然則有此美屬乃爲英產所銷諸本國本洲而尙有餘者開一至大之新市通美之貨非移其通歐者以通之使西增而東損乃舊產之外新產見增而國殖愈益饒衍一業之興皆爲國廣利源一母之用皆爲民增食力而非變其舊有者以從其新且聽各國與我平均爲競屈之商業贏率不至於獨優而爲母財偏趨之害國之物價以高如此則吾英之有此屬也以新市而鼓新功以新功而增新產以新產而得

新利他所之利一如其初而所收於屬者皆其創獲如是則謂之加富誰曰不然
自其設爲專利之政而各國商業不得平均爲競於其中於是英以辜權而贏率獨
大勢既不平民乃爭趨而舊市舊業乃漸廢矣夫設爲專利之政者固明明欲吾國
商業在彼獨優也使不求此又何爲而專其市乎乃不謂利固專矣而國中母財之
爲用乃從之益遠從之益紆益遠益紆則同一母財其養民之量以遞殖產之效以
微且由是而國之歲殖宜盈者轉虛民之積畜宜疾者乃緩然則自專利於吾屬不
僅贖功發業之效衰也而母財且緣此而不進前之弊見於今日者猶淺後之弊見
於他日者滋深也

然而屬境通商之利尙自若也雖有專利之爲害而以其利之甚宏有以權其害而
大有餘於美之所益終較於歐之所亡爲多新產之所增新母之所贖其於吾英雖
有所奪而所殖之利過之此非專利之無所損也損矣不敵其益而幸有此餘也而
昧者不知其然則以謂吾英之益富惟專利而後得之英之益富非專利之所能得

也。屬境利之甚宏。雖經專利之損。而猶有大餘耳。

美之所受於歐者。其貨固多。熟而少生。新墾之壤。農功最利。田賤而土肥。由是以所多易所鮮者。皆農民之所產。又以其地廣而丁稀也。手足之勤。皆在隴畝。民雖欲爲工。有不暇也。故凡其群所仰之熟貨。無不開爲需爲饒。皆以取易於人。而不自產爲便。此所以求熟貨於歐者。如此其殷。故自美通而歐之工商大利。工商利矣。轉之而農民亦利。由是而田野益闢。稼穡益多。牛羊益蕃。養生送死之資。舉不勝用焉。此新壤開通而舊洲所受之實益也。

外屬之商。利通熟貨。固矣。然必謂國有甚盛。方與之外屬。但專其市。則其國製造。必由之大利。前有之物產。可使加繁。未有之工業。可使興起。則又甚非之說也。西班牙波陀噶爾之未有外屬也。固歐南製造之國也。其外屬壞腴產博。爲諸國外屬之所無。而二國得此。國中工業。轉以日微。至於今。原有子遺耗矣。是何故歟。蓋得一外屬。則增一銷場。其國享實發業之事。固宜加休。而自其專市。則所收利減。然以政理之

差平。天事之相副。故雖減而猶有餘。且所餘猶甚豐者。吾英是也。外屬之利。既以專利減矣。而害之者。猶不止此。則外屬之利不見。而以病民者。彼西波二國是也。英之所專於其屬者。有冊貨。非冊貨之殊。而二國則盡所產籠之。而意尤重礦。嚴黃白二金出口之禁。使其國因金賤而百價加騰。且征收無藝。出口之稅既重。國產無以競市於遠方。稅關林立。一國之中。轉輸皆窒。其尤不善者。刑罰不中。以財貸法。遂使契徵不信。質劑虛存。小民勤動作苦。而豪猾專事侵欺。此雖在至富之國。有一於此。足以耗之。矧乎其窮集而并用者耶。雖有美屬。何救乎。

案西班牙波陀噶爾二國。政窳民漓。由來遠矣。受天主教之害最深。雖處群雄之間。民懷自奮之意。而神山力大。有以制之。使改絃易轍。其道無由。頃者丙申丁酉之間。古巴民訛。美國奉辭弔伐。西班牙大敗。諸屬皆失。使其沿而不革。則十年以往。善則爲法蘭西之革命。不善則爲波蘭之瓜分。舊教之爲禍。豈不烈哉。

若夫吾英之事。則大異此。專市固也。外此殆無往而不與。是二邦者反矣。雖東縛之

政有未盡法。而吾國工商之自由。殆歐洲諸國所不逮。產出國則無稅。國中百貨流通。不僅無稅已也。含譏開關。而貪猾無沮撓之柄。故民不望無形之害。其便利尤多。若夫極善之政。亦有之矣。法平而令信。民權獨伸。雖國君之親戚。將相之貴官。億兆之鉅子。有毫末侵欺小民者。法必及之。即以軍國重費。不得已而有取於民。非俟民之自請。不得強也。夫人情誠重自主。彼知吾勞苦所獲。可終保而長享也。斯不驅而馳。不賞而勸矣。

案英之民。非能使其君之皆仁。其吏之皆廉潔也。能爲之制。使雖有暴君。無所奮其暴。雖有貪吏。無由行其貪。此其國所以一強而不可弱也。他若西班牙俄羅斯。民之智德力皆下。故得賢王。察相則大強。得庸主懦將則大弱。如是之國。雖暫強不足畏矣。何則。國主之賢不肖。可以旦暮懸。而民羣之愚智。國俗之競否。誠未易以百年變也。

英民之工業日恢。必非專其屬之市之所致也。專市於工業。固無益也。等其舊以爲

新易其近以爲遠轉其徑而數者以爲紆而疏夫近也徑也數也商國之利而瞻功發業之所以多也乃今而爲遠爲紆爲疏則同此母財其所食之民功坐少然則專市之於工業非徒無益也實且損之明矣故專市商宗所行之政也欲損人以爲己利也乃人固損矣損各國者淺損其屬者深而已又未嘗收錙銖之利且從而得損焉使操商宗之說者誠悟其然未見其樂出此也

夫富國之道無他求歲殖之進云爾進歲殖者必裕母財裕母財者必廣積貯廣積貯者必厚其民之歲入厚其民之歲入者必取租庸廩三者而並進之專利之政於租庸廩三者固何若乎先言其庸自專利之政行則無論母財之多寡庸功養民之效皆由大而入微故勞民之得資亦由多而趨寡今夫母財非徒得也始於積畜而後有民之得資既日寡矣其積畜之效亦以日遲遲則母財不進而養功之量愈狹進富之效斯可見已故功庸者歲殖積貯之一大源也自專利行而功庸以薄

次言其租則以廩率之忽增也其勢有以害田野之治關蓋役財治田之利視未治

之前與治之之後所收之利之差。卽差課贏。使是贏率。過於經商者之贏率。則民之用母也。將由商而趨農。不及。則由農而趨商。故政有以使經商贏率之日多者。皆形治田之利。使降少也。惟專利之政。田利過者。抑之使弗過。田利不及者。甚之使愈不及。使弗過者。禁母之趨農也。使愈不及者。勸母之避農也。然則專利之政。名進商業之贏率。實無異沮民之治田矣。治田既稀。田租斯劣。夫田租者。又歲殖積貯之一大源也。專利行而租亦以減。且其害不止此。自贏率之日高。貸資息錢。從之日大。常法買田。皆計歲收而定復償之年數。故息率起則年數少。息率降則年數多。如是則專利之政。其害本業者。既使田租之降寡矣。又使田價之日微。

租與庸如此。然則專利之政。所獨利者贏矣。雖然自其小而易見者言之。則贏率誠以此而進。逐末之利誠以此而優。顧自其政出。國之積貯日微。則自其大且遠者言之。所進亦不敵其所退也。蓋商國之計。贏率微而母財鉅者。其歲殖終過於贏率鉅而母財微者也。專利之政。既使母財微矣。則贏率雖鉅。所得固不償失也。

由是而觀之。專利之行。於庸於租於贏。幾可謂其無一利。其所利者。不過本國之中一業之民已耳。餘民固皆害也。至於他國。則其民皆害而非所利者矣。

夫專利之所以利於吾商者。非他。徒以贏率致高故耳。贏率高。所益寡而所損多。既如此矣。若更即已事而觀之。則將見彼所謂益者。有大損焉。即伏其中。其深且遠。有加於前而無不及。又以見獨利之必不利也。蓋自贏率致高。而吾商謹儉之情。坐毀故也。夫經商之家。計利析秋毫。固與者最以謹儉著者也。自贏率忽高。彼以爲豪侈雍容。而後與其處境相合。則前謂儉謹之德者。厭其奢吝。棄若弁髦焉。今夫多財之賈。廣畜之家者。人情之所歆嚮也。以其歆嚮而則倣生。其爲國俗先導者。過於他等之民也。主人儉。則傭作之徒侶亦儉。主人奢。則傭作之徒侶亦奢。初非有意相師習也。風氣潛移。若不自知。由此則一國之內。向執生利之功。而最能積財者。其銖累寸疊之機息矣。積貯既微。母財自薄。母財薄。則無以加贍勞民。而向之將以口充者。今且見其日狹。生利之功。烏由進而益盛乎。不觀於克諱支力斯彭二邑之商乎。其贏

得可謂優矣。而西班牙波陀噶爾二國之母財未嘗進也。其民之貧丐未嘗改也。而固富矣。其於振貧勸功二者之事何賴焉。操不軌之率以收數倍之贏。然是二邑之商不徒欲益國之母財有不克也。且於已之母財欲爲其持滿守舊而猶難。故二邑之商最竊。而其中商業之母財方且仰資於外國。外母闕入則欲以計去之。而率較之令乃愈嚴。愈嚴乃愈病。今試取是二邑之商情以與荷蘭之安豪斯他丹者較。則所由贏率低昂而商品與商德從而大殊者。顯然見矣。若吾倫敦之商則介乎西波荷蘭二者之間者也。以比西波之商固未若其奢侈。而比荷蘭之商則又遜其恭儉。然而倫敦之賈以瞻其富厚則上比荷蘭固不足。下方西波猶有餘。此其故豈不明哉。英諺有之曰。跋來者報往。然則人之不節者不必見其揮霍而後知也。當其所以得之不難。夫已可決矣。

是故專利之政於天下之衆既無往而不傷。卒之其所欲益之家亦未嘗以終益。然則彼操商宗之說者何利焉。今夫以一國之力廣辟輔員。不過爲物產通其銷售之

路者此以商賈之道謀國者也。然使賣人謀國其計將不出此必也有謀國之人而爲商賈之所用者。夫而後計出此耳。今有人於此謂買者曰若爲我置名田而我之購衣裳冠履也將惟爾肆乎取之。雖價貴於他肆之所售者吾不他往也。則雖天下恐賈其應是言未必如響也。又謂之曰設有人焉既爲向者之人出金置田矣吾令施惠之家責受田者其家苟有所需必爾肆之是取如此則天下之賈皆欲之矣。今者全英之民所謂出金置田者也。而美屬墾荒之民則空手受田者也。而責購物必於其肆者則英商也。嚮者吾英以其民治生之或難也則出資經營廣田於數萬里之外其田價固甚廉非若本英之計收爲價約三十年而後復之常例也。其田竊幾無垠而所以爲價者不過其始覓地之費繼則巡守之費終則規纂之費已耳。土壤上腴廣袤莫極至其地者任情自占在在可加手足之烈而大有功方其始也歲之所出不擇國皆可售如是垂三四十年（自一千六百二十至一千六百六十年）而戶口大盛富厚有加及是時而吾英商賈逐利之民乃群起而責專市之政矣夫

是商賈者。於始者置地之費。後者治地之費。不必其所出也。而獨以生爲英民。宜享獨優之利。是故其外屬之民。設有購售。不得購於至廉而售於至貴也。而自今以往。將必與英賈乎通之。有求於歐貨乎。則英商爲之供。有欲售之美產乎。則英商將擇其可者而受之。其所要於當時之議院者。蓋如此。且所謂有售而擇其可受者。蓋美之所產多。而英之商不便於悉受。三。悉受則其與英產同物者。將反蒙其侵而不利也。於是乎制爲冊貨。非冊貨之別。賦者。英所樂受也。將必英而受之。非冊者。英所不樂受也。則聽其他售。且責其遠去。此所以有非冊貨必行於非尼斯底爾之南之約也。蓋自航海條例行。而英國賈人之請。十事九爲律矣。故曰以美屬爲專利之場者。使商賈自謀。尙不如此。必謀國矣。而爲商賈之所用者。夫而後乃廢英民之征稅。喋英民之膏血。前以力征。後以兵守。而爲此區區也。彼徒譏英爲賈人之國者。尙未密合哉。

而世俗且謂英之樂有此美。而據之以爲屬者。凡以長享其專市之利故耳。夫苟不

專利則英之有此屬者與他國非有之者何以異乎且彼屬之民於宗國之設官以治民詰戎以禦侮或文治或武衛未嘗賦半菽一丁以資邦用也乃徒責其交易之勿外通此固彼屬之大利也英曷嘗多取之以爲虐乎故專市者美爲英屬之左驗而亦爲英有美屬之收成有此則所以爲宗屬者存亡此則所以爲宗屬者去也無問英之張皇海陸凡所以守此屬者爲費幾何凡爲此專市之勿論者用耳方美屬民証未起之先也計英之所費而可指者則二十校一英以千人爲一校一步兵之餉金也而礮械輻重與夫糗芻之供稱此矣數十百艘海軍長養而時巡之凡以紹倫漏杜覬覦於北美西印二者海岸港汊之間其需財又已鉅凡此皆英民之所出而於美無與焉且此猶其小小者耳必計其全則無事歲費之外必益之以有事之增防費一也費之子錢二也若夫輓近二戰之費則又一大宗矣何則其爭固起於美屬也最後一戰其費已過九十兆鎊矣緣此而英之國債增亦由此而英之田賦加什一凡爲此用也至若一千七百三十九年英與西班牙之戰則以美船行商古

巴巴西間西班牙斬之英民助其屬而壹啓則亦由美屬而後有此者矣統此無事之防有事之戰英之所費固誠不貲而其實無殊專市之獎費獎專市者所以冀英之工商盛也而就謂舍增高贏率之外雖有所轉移而未嘗獲實益也

自今之道無變今之形則英之得美以爲屬者實未見其大利也且豈徒無所利而已而損且從之假有謂吾英之於美宜悉去其君臨之勢官吏宰尹聽其民自推擇典章政令聽其民自議行交鄰戰媾之宜聽其自決所處進是說者乃取前所未曾有後所莫肯行者而進之其爲駭聽豈待言哉自古迄今國之有屬者無論其難治勞費爲何如所得之利與所費之力其不相及爲何若而忽然含棄者未有聞也蓋其事自度支之損益而言之雖常爲其善策而國之威嚴則有傷矣且度支雖損民之所出也而國主之權力固常以拓地辟土爲榮加之士大夫得此官職封除從之以廣富貴徑術因之以多其屬雖爲國煩費於彼固無害也損之則是數者皆去是故議棄國屬之事君與臣皆不欲也就令論之至明言之至切而國民公利終不敵

主治者怙權之私。此用前議者所以絕不聞也。雖然。假令用之。則若英與美者。將見英不徒歲省不訾之費。且可立之盟約。開自由之互市。而不爲壟斷之私。雖商之贏率。坐以退減。而於通國之民。則無窮之利也。無所抑制。而大順民情。故宗屬之誼益睦。雖有近者之憤爭。而棄瑕復好易耳。且今之田而居於美者。固英人子孫也。相親之誼。繁而不殊。吾於彼既有大資如此。彼美民之所以報英者。必將永爲石交。平日則易事而通功。有事則左提而右挈。英爲慈父而美爲孝子。彼古希臘之宗邦屬土。不得專美於前矣。惜乎吾謀之莫能用也。

夫國得一屬而收其益者。當其無事承平之際。必是屬之所出者。不獨足以治是屬已也。而京師總治之費。亦必與他部分任之。蓋國之疆索愈遙。幅員彌廣。其總治之費益奢。使其中有不分任度支之屬地。則他部之所出。勢必偏多。而不平之賦以起。處戰爭有事之秋。軍需浩繁。亦宜比例加征。用以稽柱全局。乃若北美之爲英屬也。無間經費軍需。未嘗與宗國分任焉。議者以謂有專市之利。而英民之私家富。私家

富故其供國宜增然則英之度支雖細於美而以有專市之利乃可取盈於英其成賦也名異而實不異則於國何損焉此其說近矣乃不幸專利之政蒙其益者獨英商耳至於其害不獨於美之民爲至深也即英之民亦損多而益寡夫經費者固通國之所賦而不能獨資之於蒙利之商國家成賦則壞固有常經即欲偏重於商有不能也夫既平均爲賦矣而供賦力增者百一坐有專利而損者九十九則英之度支常細何疑焉

於是議者曰則奈何不取美屬而賦之曰賦之誠善而賦之之道當何如則將不出二塗而已聚其長老使美自賦以供吾英一也英之議院定則布憲而後賦之二也夫聚美之民舉使議爲條教以各行於其鄉將使後之所哀於民者不獨以支美之文治武衛而有餘且倫敦總治之費亦使與本英者比例分任之而無畸輕此不易成之政也夫國之經費必待民之自諾而自征者固英之成憲而最良之法也而用財者常欲裕出財者常欲盡人之同情也故英之議院居叢殺之下爲國主之所日

治而欲其所勒定之額征當足於軍國之用而無憂缺乏者蓋經禁久而後能勒爲成規其始也國之文武吏職如某官如某局王必畀以下院之議員使自爲之抑山其除授而後民樂從事凡此皆可行之於英而不可行之於美者也絕大之地距英萬里而遙非國主之所親督其口數多其所居散其各部之士俗不齊凡此皆欲用前法者之沮力也就令王能爲之其難已如是矣矧乎其不必能也英之吏職勢必不能畀之美議院之領袖也苟此之不能而謂彼中豪傑長老乃不惜樹怨襟背之間勤催科以集巨款以爲吾英遙制總治之資躬爲謗府而詔諭之利則歸於莫知爲誰之英人者殆必不然之事矣又況一集之中人之才智權力有高下一屬之內部之大小強弱各不同用者銖兩之差輕重輒異輕重異則恩怨分非與曹偶者其舉錯不能當也而吾英乃欲以遙制行之則將以得罪賈然有餘由是言之此政之難成豈有涯哉

案斯密氏此言固即當日之形勢設在今日行有汽舟令有電郵報紙大行纖悉

俱舉固當易也。而所難者在權移議院耳。英之外屬其大者猶有三方。澳洲也。剛那達也。印度也。他日若分而自主。澳洲二者當先。而印度則將終古爲隸。何則。澳洲多白種。而印度盡黃種故也。今之歐人動曰天生白種。所以君人者也。嗟乎。此與云匈奴天之驕子。何以異乎。自不佞觀之。黃種之權雖失。固當有自主之一口。特其事非庸妄自棄者之所能爲。尤非木強自大者之所能爲耳。

若夫通國之戰守。方統全勢而圖之。尤非一屬議院之所能決也。彼之所圖。固自爲其一屬之事。至於全局之措注。夫固有主之者。欲其以外而兼內。則簿書報奏之。不周雖欲爲之。其道莫由。故屬之民會。其於藩政。無異守宰之於郡縣也。使一屬爲一國謀。無異責守宰以樞府之政也。豈徒全國之事。彼有不及知。即其本屬與全國相待之形。其民力財計。於全國之輕重者。又何如。屬之民未必洞悉也。蓋知此者。必總一國內外之計。而後可。顧計之所上。不在屬而在國都。且以非其職。故情所不急。而慮亦不精焉。是故通籌國之全勢。以爲一切戰守之備者。與夫權所轄之屬之形之。

重輕力之優細以定所各出之歲賦者必主之以宗國京都之議院總攬案文大錄庶政者而後能之使偏圖全使外謀內抑自定其所比例應承之分任皆非彼所能爲矣

由是屬之成賦也常準本英議院之所定者而征之英議院頒定歲賦之定額屬之民會因其地相其時擇其最便者勅爲則例以徵諸其屬之民其爲此者意亦謂全國之事惟居經首之地而有總攬大錄之責者而後能爲之至於因地相時之事則聽屬之自爲可耳雖美屬之於英議院向無特舉觀政與議之員顧吾黨自其成事而案之則議院所定歲額亦未嘗緣此而有不公不平之事也蓋部無議員而設爲侵牟之意使其稅額特重者議院所必不爲也即如近部若古恩斯若雅西二島之民向無議員議院設重其稅彼二島民固莫誰何也然而其額常較他所爲輕不徒無所加重而已可以見矣夫則壞成賦彼議院引爲應有之權應盡之責此其應法合理與否姑勿深論而可知者則所征於美屬之稅實較本英之所出者爲輕不及

比例之額尙甚遠耳。向使美屬所出之賦其增減輕重一與宗國之田賦相準。議院欲加徵美屬則必先加徵其所當之各部。一議院部各舉員故各員皆有所當之部。然則美屬雖不舉員與議而屬之休戚與宗國均其與舉員觀政與議者。權利亦平等耳。

歐洲諸國賦稅大抵分國部而定其所出之多寡。專制君主之國其王特舉一二部而自定其賦額。餘部則令其地長老民會自徵之。則於合而足於王用而止。今如法蘭西其中名部有四。王不僅勅其歲額已也。其責賦之法王且自定之矣。至於餘部則總責成數而每部之鄉官長老議其征抽之政行焉。故英議之所行於其屬者無以法王之所施於餘部者責其成數而聽民會之自供。夫如是之部雖在國王邦域之內無異小國之隸於共主而操其治理邦賦之權者則其地之民會長老是已。雖然用是道以征其屬者在屬固無供國畸重之憂而在宗國則轉有屬賦畸輕之慮。夫英議院之權所以臨御美屬者向未能如法王之臨其國部之重也。夫民情不

乎者其常而乎者其偶。假使一屬之內民情未孚。則議院所勒爲歲額者。彼固可設辭爲解。而弁髦置之。今且無言其餘。即如英法交兵。軍興之費。須十兆以往。於是議院議先貸財於民。而由本英與北美西印諸外屬加稅償之。當此之時。民之用財貸國者。其心將以謂。責之本英者。可以無慮。而其責於外屬者。不可知。蓋其事懸於在外者之民心。彼憤宗國之見侮。慨然爲本根之庇。可也。情以遠而目疏。謂其事爲於己無與者。亦可也。如此。則貸者常持兩端。而款之集。每不及事。故償之必舉。而此時軍興之所恃。以不乏者。特英民之所自任者耳。如此。則戰費之重。本英之民承之。其休戚繫於全局。而重困則任於一方。此自英有外屬以來。其事莫不如此矣。今夫承平。則土地日廣。而至有事。其財賦之實力。仍獨仰於故國者。天下唯英爲如此耳。若他國之事。則王國所承者輕。而寡。而外屬所責者重。且多。英不獨求出其輕不能也。求乎其平。且不可得。必欲得之。勢非使本英議院責稅之權。大伸於其屬而後可。第大伸是權。又爲事之至難者耳。

何則。使吾英議院有實稅外屬之全權。而無待其中民會之諾否。則其會之勢力墜地。而其中豪民長老之勢力。亦將與之俱盡。人處一群之中。而常欲與聞國論。攘臂濡足於一群之公事者。無他。凡以爲權勢地耳。以力征經營者。其開國有勳。資以游獵耕牧聚居者。其成群有長老。二者名異而實同。故合衆之政府。必有以存長老之勢力。使公私合同。而後其所立之政府。有以不傾。長老聚衆者。合衆之眉目領袖也。人人自以爲宜執魁柄。故其勢常不相下而相攻。美之豪衆。何獨不然。彼方以民會爲國權之所歸。其尊且嚴。與舊英之議院埒。使一旦毀其牙角。不復有定制出令之權。而惟英議院之命是聽。果而行之。變議政之官。而爲布政之府。是民會之權失。其聚者失。則其散者亦以不存。故長老豪衆之勢力與俱去矣。是故英議院責稅之權。必不待專行於美屬。設必欲行之。則其中豪民有起而梗命而已。彼以帝國死於兵。必不能失勢力而偷生也。

羅馬之立國也。其始爲合衆公產制。國勢日張。浸假而強有力者。寡之。變民主爲君

王位號英拜勒爾英拜勒爾者以其義言之則君也令尹也以其出令也方其民主則出令在聖泥特聖泥特長老也及爲君主則出令在令尹而聖泥特虛設存空名耳一羅馬自沃古斯達稱令尹今人取其號以當皇帝未甚合也一羅馬之民齊分二等其本種爲邑籍其攻取與慕化者爲屬籍合衆將變之頃羅馬兵額財賦屬籍所出重於邑籍則群起求列邑籍令所享權利與本種均不許於是有爭籍之戰羅馬欲分其黨也則許先服者其勢遂漸散而大亂救焉今吾英之議院必取美之諸部而自征之而美之民則謂英有議院美無議員其定賦額吾固未嘗諾之也則甯死不肯出是賦併爲一談連衡諸部此無異向者羅馬屬部之爭籍矣假使吾議院循羅馬之故術許其歲奉議員入院觀政而員數之多寡視出賦之上下夫如是則令朝下而美之抗征者夕解矣何則彼中豪桀之所以抗吾令者以謂俯首帖耳則勞力大去今吾使之得企鵝員議員之勢大於長老則彼之美而從我也固宜夫民情之喜高亢而惡卑溲也久矣一軍之中人懷爲將之略一邑之內家裕作令之才

與之以可進之梯。則彼將入吾彀而不去。設非類此之術。吾未見近禍之能息也。必以大力壓之乎。則議者應思。繼此之冒鋒刃而喋血戰場者。皆吾英之才民壯士。國之所恃以禦侮者。英與美又何間焉。今彼中所號爲洲會者。非徒立也。亦有能者爲之謀主。彼之所圖成。與其所欲有之勢力。始向者歐民意中所未嘗有。律師賈人。食力之子。人人有開國之慮。道民之恩。彼方惴然以爲合其策力。方將肇隆平之規。而爲天下導先路矣。而徒營其妄。謂必無成。殆未可也。洲會之聚者五百人。而從其號以赴事功者五十萬。此五十萬五百人者。所懷之大小不同。而皆有去卑溲而就高亢之志。方其發揮張皇也。其所欲就者。豈徒智效一官。感施一邑已哉。蓋將求其樂。今振古者矣。苟非急出良計。有以厭其豪華之侈心。吾恐英人將從此疲奔命也。亨訥者。法之舊史氏也。其叙累加之民証也。一果加譯言聯團。此所言蓋明萬曆五年巴黎內亂之事。當是時。法故王薨。而新王顯理第四初立。巴黎民保舊教。則相與聯團拒之。而後卒爲新王所平也。一極詳密。凡時事之瑣屑者。幾盡書之。自當時觀

之若無關係也者。顧自今言之。閱者轉實史家之用意矣。方事之起。人人自以爲要人。私家記載。其流傳至今者。猶多大抵皆作者述其自烹之詞。張其所爲之事。以著已之係於國與時者大已耳。巴黎數城之士。出死力以拒新君。至於糧盡力窮而不恤。而卒之其所不納者。則法國最仁之主。而後爲法民所深慕極附者也。蓋國城之內。所率死黨。以與新王旅距者。慮舊政若傾。則已之權力勢利與之俱去。然則其所死守者。非城。乃其舊法。非其舊法。乃人人自以爲宜享之權利耳。今夫英者。待屬民最厚者也。而屬民方與之抗。設非以計誘之。使就吾範。吾恐英民將出死力以拒最厚之宗邦。猶前者法民之出死力以拒最仁之國主也。

各部推舉議員。使之處於發政施令之樞。以共治全國。此制至善。而古之人未嘗及知者也。若夫羅馬民主之舊制。則邑籍之民聚而爲之。故一旦進屬籍於其間。與之公議而並推也。前之邑籍。不可復辨。而新進者乃反客爲主。喧喧排傾。而舊種之權遂奪。故羅馬自進屬爲邑之後。其公產之治。雖焉。而英進美屬議員。則無慮此。蓋使

美遣五六十人處於舊者數百員之間。此不獨議院之議長與議員能辨之也。即監門之吏亦能分其孰爲英孰爲美也。且此舉豈徒無害於英之議院而已。不惟無害。方且益之。蓋得美之所舉者而後其制備也。議院所治者。通內外全局之事也。欲其皆善。必見聞無不周舉措無不合而後可。故議員之選也。宜使國無定都。人才之至。徧於所治之區。夫而後見聞周而舉措合矣。非敢謂吾計設行即無所窒也。願吾嘗深思而徧訪之。卒未聞有甚病而不可補救者。然則其事固非難行也。難在大西洋東西兩岸之間。其居民之成心視見已耳。

吾儕東岸之民。則恐議院平權之制。將以美之議員而傾傾於上。則張君主之權。傾於下。則成民主之局。不知果使美之議員其多寡以所納之歲賦爲比例。則度支進而待治之民亦多。故君主之權無由張。所治之民多。而爲治之度支隨廣。故民主之勢莫能成。將見議院員數雖加乎前。而君民平權之實未嘗改也。

而隔海之美民。則謂以議院絕遠於所治之民。恐制立而美民重困。則不知美之受

國以無議員故也。既有議員，且其數多，其勢必有以保之，更不至於受壓也。夫謂隔海遙遠，其事固然，顧不能以遠故，致所舉之人，與所舉之民，情睽而勢絕也。議員之權，民實界之故，其持議行政，將必以部民之意，向爲指南，而以得其驩心爲貴。得其驩心之道，莫若爲與其所利，而去其所苦。若官吏若弁兵，有得過於其境者，彼將大聲疾呼，正之不遺餘力矣。此其非所慮者一也。且所謂隔海遙遠者，亦未必長此終古之事也。自屬通以來，美之日進富庶也，有日升月恆之速矣。如此將百年以往，美之所出，大過於英之所賦者，未可知也。賦過則所以爲治理守禦之資皆過，行見京畿之立，將在美而不在英矣。又安用以遠爲病乎？

亞美利加之得，與夫繞好望角以達印度海道之通，二者實自洪荒開闢以來，莫與齊大之事也。二百餘年，其效驗之著於人事者，已甚衆矣。顧其果之盛繁，斷斷乎非二三百年促暫之時所可盡也。二事者，將爲生民之福利歟？抑將爲各國之厲階歟？雖有明智，不敢決也。雖然，自我觀之，則自二塗之辟，而天下之睽者日親，人類所

享日以益宏。生民之業日以滋熾。則姑自其可見者言之。必利多而害少。所不幸者。得新地之時。歐洲之民其勢力大一世。能以不義無道之事。加諸遠國而莫可誰何。由是而東西二印本種之民。徒見交通之禍。而未嘗蒙其福。顧此誠事勢之偶逢。而非必通之能爲禍也。過斯以往。造物者循其平陂往復之機。則今之名弱者。後未必不日強也。今之稱強者。他日未必不遂弱也。坤輿諸種。因將降即於平。而末由相害。然不相害。必自有以相畏始。且舟車之來往日稠。民之智慧得相師資。日爭趨於良。以爲強。日爭祛其精以救弱。此通商之事。所以有磨鈍厲世之功。其利不止於各得所願已也。

案此言自今日而觀之。則老生常談已耳。願當二百餘歲之先。非上智之士。不能道也。

東西海宇開通。其後效誠廣遠而不可窮。顧及今所可見者。則商務規模。乃至盛極。閩大異古初而已。古者以商賈爲末業。甚且以爲汙處者有之。古謂富國之效。而通

農工乃今觀之雖有農工非商不富蓋非商盛則農工亦無從大興故也則二百年以來國於民業先邑後野又何怪乎歐洲都會前之所通不過地輿中一小分若沿大西洋與地中海二者之濱已耳乃今所謂工廠梢業者暨乎四洲歐之外有亞美非三者其宏大廣遠要皆爲其享實發業之資且泉達火然其機方將而未有艾士又安得守古人之成說以議今時也哉

案西人嘗謂商市歐洲最盛而歐洲又英國最盛者雖曰人事亦地形爲之耳設分地球爲二半其一爲陸半球其一爲水半球則英島實處陸半球之中央歐洲海岸出入海綫最長而英爲島國無地不可與水通當墨西哥灣溫溜之衝氣候溫煥總是三者此所以能獨握海權牢籠商務擬萬國而上之非偶然也顧謂十九稔前英以地勢其商業宜甲天下是則然矣第必曰其事將恆如此則自諛之論殆未可信往者世治初進埃及印度安息實爲奧區浸假而希臘而羅馬而英倫則過是以往勢將又遷汽車大行而海綫之長不足孤損故二十稔以往將地

大氣厚者爲文明富庶之所鍾焉。然則雄宇內者非震且即美利堅也。

且夫東西開通之大利。享之者不僅有屬之國已也。有屬者其商工之所進拓。誠爲無窮。而歐之餘國。雖爲條禁之所遏。不得徑與往來。而究其終事。則分享其利。自若試觀波陀嗎爾西班牙所有之屬地。其中所通之物產。出於波西者少。出於餘國者轉多。即以麻布一業言。放之所銷。幾三百萬錢。而大抵運於法蘭西。伏蘭德。荷蘭。日耳曼之所製造。其產於波西本國者至寥寥爾。凡此商業。其母財之用。而爲享實發業之資。前數國實受之。而波西所分。乃其贏利。贏利無益於勞民。徒以供大商巨賈之豪舉已耳。

國爲條禁。饒其屬之利市。屏餘國而錮之。乃其效傷人輕而傷已重。蓋厚私利而困民生者。其術無往而不自因。此亦天道人理。報施之公也。自美屬之利。英商專之。則德國罕布爾格之商。之致其麻布也。不得徑以赴美。而必於倫敦之市售之。其取於業也。亦不得徑由美而必於倫敦乎取之。如是則彼之售布也。價固稍賤於售美。其

取於也。價亦稍昂於山美。則是自有專利之條。彼德商之贏利以進矣。雖然。英德之開海船之來去如織。方之浮舟赴美者。其疏數之懸。歲數倍也。則其母財之復。疏數視之。然則使美之償通應期。一如倫敦之市。而母財速復。固德民之大利矣。況乎美之償通絕少。應期者耶。母財速復。則勞民得養。而國殖日滋。故其事在商。則近利遜。在國。則遠利優。而吾英之利反此。極其可言。不過商肥而國瘦。而昧者固以商賈之近利爲通國遠且大者之公利也。何可哉。

歐之諸國。有行專市於其屬者。極其能事。得利僅足以償其守此爲專之費。故得一屬以自累有餘。而通商利源。雖不與天下公之。不可得也。夫美利堅固莫大之新壤也。以開闢未洩之奧區。全其物產而有之。價之高下。惟吾所欲爲。國而有此。何憂不富。此其說所以聽獎者素也。大欲中於其私。而智爲之贖。彼以謂即爲此。以與天下力爭。其所得之厚實。煥耀美富。足以償之。而不知專市所以病國者。即伏此煥耀美富。人人以爲可欲之中。蓋其市非真大利。而人人意已爲然。群然趨之。空國母財。萃

如一渠向使人人順利之心。無所偏重。則商業亦無畸大之弊矣。

吾向者之論商業也。分之爲三。而第其利國之高下。以爲任物情之自趨。則民之役財。將擇其最利於已者。而是利己者。亦即與利國者不期而自合。使其財用之於國外之捐商矣。則異國之產。將輻輳於其本都。而經商者常欲遠運貨復出之煩費多虞。故雖價稍遜。亦恆願就本國而銷之。如是。則前爲捐商者。勢且漸變而爲中外之貿易。且中外之貿易。又不若國內貿易之懿也。則浸假且轉內外之互易。而爲國中

之灌輸。故各國而買之役財也。大抵皆樂其近者。而憚其遠者。樂其數於復母者。而憚其疏且緩於復母者。樂其爲國贈功多養民業者。而憚其贈功少養民微者。此其大較也。故曰任物自趨。而之逐其私利。無異爲國廣公利也。

然使有故焉。有以使逐遠者之得利。敵其多虞煩費之不便而有餘。則商之役財。又將舍近而謀遠。有餘者不已。徙業者日多。猶水之遠高而就卑。必俟其平而後止。蓋是羣率之所以獨高者。即其時遠業與近業相衡。母財之用未得其平之明證。而當

時之人事必有以致其如是。又可知也。向使道國者任物情之自然。則遠近之業。役財斥母者。將自得其平。而無畸重輕之爲弊。惟畸重輕。故贏率不同。此厚而彼薄。而以此獨厚之贏。則可徵在市之物。必有售之過昂。抑或買之過賤。而邑中之民。亦必有所受太少。抑所償太多。爲時所困。致此不均者矣。夫國之役財。營遠業不如營近業。固也。而有時遠業不可無。無之則國家其害。設近業之所治。必待遠業所通之物。而後舉。而是時遠業之贏率。獨優於常。則其物之售人。必逾於經價而騰踊。如是。則近業之待此者。受其困矣。困而求其舒。將必有移近業之母財而注之於遠業者。夫而後其贏率有趨平之機。而物價有反經之時也。夫近業固人情之所樂。而遠業之獲利常迂。而時勢不同。則將有反之而轉爲利益者。當此之時。財移於近業。以營於遠方。商之私利在此。而國之公利適與之符。有非可以常法論者矣。

由此觀之。一任其自己。則遠近二塗之商業。母財爲用。向背之間。商之私利。無往不與國之公利合也。一塗之母財。少用則贏率高。高則用母者趨。趨而過則母財爲多。

用多用則靡率下。下則用母者違遠以節趨其利乃平。而群受其益。此非居上者以政爲之也。民各顧私。而國中之積畜。自有以周群業而財生焉。其纖悉靡不中也。其輕重靡不得也。曷嘗有理財保商者爲之鯁鯁乎。

案此與太史公易言有徵發期會之語。若合符節。

自有謬人淺夫起而持理財保商之說。而出之以政也。於是自然之機窒。而天成之局廢矣。保商之政。固無往而不害。而其政之見於北美東印者。其害尤糾紛而不可救也。蓋北美東印。字內之大域也。自保商法行。是二土者之業。有以涸吾民之積畜而無餘。雖然。其害同。其所以爲害稍異。同者。同乎其專利也。異者。異乎其所以專也。嗟乎。彼號爲保商者。舍專利而外。固安有他術哉。

美洲南北之閒。散爲四五國之屬境。是四五國者。皆欲籠其市利而專之。若禁鬱然。非他國所得染指也。波陀噶爾走海之民。肇通印度之海道。十六棋之際。彼之所以事印度者。無異前者之事美洲也。自以謂海道自彼通之。故宜獨享其利實。印度東

西諸海非波陀噶爾之舟將不容行駛也。往者荷蘭亦得支那以南之群島矣。擁其椒桂之利。不畀餘國分焉。凡此壟斷之所爲。皆以損人爲己利。夫大地之日通。天因所以厚民之生也。自有壟斷之爲。而其機遂隘。何則。民有貨非彼無可售。有所需非彼莫由取。不得徑爲通功易事。常有第三人焉介於其間。以賤其利故也。

第自波陀噶爾之中衰。而印度之海禁弛。由是各國之治印度商業者漸起。而皆有專利之公司。其無之者。獨波陀噶爾與近數歲之法國已耳。前者北美諸屬之專利。所以閼各國也。而茲印度之專利。則閼其同國之民。有所往於印度乎。必投之公司。有所取於印度乎。必索之公司。在在必爲其貴。不得爲其廉者。設其爲之。則犯憲之事也。自英有大東以來。民不僅欲經營彼土。不可得。印購彼之物產。亦必出至昂之價。而後得之。此所昂者。不徒公司之罔利使之然也。暴殄之所糜。奸欺盜竊之所亡失。專利之公司所無由解免者也。而其損必使購者彌之。此印度物價。所以有日長無日廉也。噫。專利謬矣。而後之專利者。其術非尤謬者歟。

案波陀噶爾表而荷蘭英吉利之大東公司相繼立乾隆六十年法國民兵盛荷蘭爲法屬其大東公司乃廢克來福者英之無賴子也以窮困傭於公司中常將數十百人與土民及法人戰輒克之最後以孟加拉那博投英人數十於石穴中殺之克來福率英之寓居者及印度土兵爲復仇適有內應遂奪孟加拉全部英之全得印度基於此當是時拿破侖蹂躪全歐嘗欲據埃及通安息以規印度既克前二國矣而舟師爲英人燬於尼綠終拿破侖之世不克復圖印度逮嘉慶四年法人猴密曉里印王智布與英戰不利死而英遂有印地大半嘉慶二十三年取馬哈達繼而廢印之共主號大蒙兀者而英人之有印度與磐石矣蓋印之於英也其始不過通商步頭猶支那滬甬之界已耳自克來福奪孟加拉其地上屬國家公司之制名存而實廢沿延至於嘉慶道光間而後專利之公司盡罷公司罷而印貨之售於英大廉其來往海關按期加稅足以徵斯密氏之語之不誣也故英人謂印度以有公司國之利減者無算而民間加富之效尙猶若此向使善

其術而爲之。其富厚又當何如耶。斯密氏生於十七世紀之間。其言計利弊心精眼明如是。此不謂之命世之才。殆不可也。

以上二種專利之術行。皆有以使母財之用。不得順其自然之致。特所以亂之者。各不同耳。以前之術。專利者常有以使母財之用。偏趨於其業。過於未有專利之時。所自趨者。以後之術。有時招致母財。使之來多。抑有時拒抑之。使之來少。視其時事勢之何如。以爲異。今如其術用於貧國。其勢自使母財之用於其業者。多於未有專利之時。設在富國。則其業母財之自注者本多。轉緣公司之立。利爲所專。雖有母財。爲所禁遏。而不得用於其業。則拒抑之。使之來少者也。

假如在瑞典丹馬諸貧國。無專利之公司。則其民未必以一船之舟通印度也。彼國之所以設專利公司之政者。所以懲愚其民。使爲此耳。蓋有專利之政。則商於印度者。不憂同國之與爭。而外國之銷場。則與他國同其廣狹。而所以爲競之權力。正同由前之專利於其國。則邱山之來貨。其奇贏可以操券矣。由後之平均爲競。其奇贏

於出貨者亦可以微幸。向使不爲專利之公司。則彼生爲貧國之民。操易賤之財。必不肯涉數萬里之風濤。而與他國富商爭此不可必得之利。明矣。所謂招之使多者。其事如此。

其在富國反是。向使荷蘭無專利之公司。彼民方競於滄業。則所至印度之舟船。必多於今無疑也。設爲專利公司。其母財之用者。有制而不可踰。慮其踰而利減。如此則拒之使不得用於印度商業者多矣。蓋荷蘭富國。商本之日積者至多。而恆有外溢之勢。其去而爲外國之公債者有之。爲外商所賣之私母者有之。其通商之業。則徑者已盡而從其紆。近者既盈而爲其遠。此荷蘭母財不憚遠輸以逐贏利之實形也。向使役財之途。不爲專利公司之所限。則外溢之財。將見悉趨於彼。蓋印度銷場至大。不僅有以通吾歐之熱貨。而美洲所出金銀注印度者。亦如水之赴壑。計其廣遠。以抵歐美二洲所共受者。尙爲有餘也。

案後之計學大家穆勒嘗深考國財愈豐贏息愈薄之理。而著爲例。今觀斯密氏

前後之說蓋已爲穆勒導先路矣。蓋積蓄歲歲而母財日多母財多而商業如故者其贏率必日趨薄。富國之民往往病此欲拯其弊則用母之道必歲有新開辦業日宏贏率不降故如墾新田如農用新法如益精製造皆爲此也。即不能則不若貸之異國以興其業夫母財溢而出以假人無異民丁溢而謀庸於外也。前所以掣贏息之過微後所以掣庸錢之過薄。今者中國地廣而不富而國中可興之新業最多此所以浮海藝工日以益衆而各國爭欲主中國礦路者亦正爲此耳。夫毀自然之局成抑遏之規用之商業之中者未有能利其國者也。民有積儲欲用之於某所以觸禁而不能某所之業本非所利也。以上之誘致而姑爲之凡如是者皆病國。夫使荷蘭之於印度也不聽公司之專利則國財之東注者必多於今日而其所利多者誠以其多而利故也。乃今抑制之便宜多者反不得多則其害必有所處矣。又使瑞典丹馬不設專利之公司則國財之東注者必少於今日甚且至於絕無而其所以少而絕無者誠以爲之而不利故也。乃今強誘之便宜無者而反有則

其害亦有所處矣。今夫國之理財也。當其宜多。不可使少。當其宜避。不可使趨。一任自然。則民自爲謀。而合之於國大利。是故若瑞典丹馬者。前以貴權取印度之物產於他邦。必不宜以其國中有有限之母財。棄近市而徃於遠利。其復母避其弊。功寡而國中生利之業。待本方廢。而無從得。乃徒歸他人之所爲。不量已力。形勢而從之。荷蘭所爲。其損國固已重矣。瑞典丹馬所爲。其損國乃尤重也。

或謂如瑞典小國。設不俾民專利。則其國與印度將不通商。此專利之政。所以不可已也。不知苟不俾專利。則民不自爲商者。此其國之不利於商印可知。如是雖俾之專利。自其國言之。未見其實利也。且商之通不通。與利之專不專。又何涉乎。先通印者。波陀嗎爾之民也。海通以來。波之商其土者幾百餘年。然未聞有專利公司之設也。則可見商果利通。不必設爲專利之政矣。

或又謂印度通商。其事至委曲繁重也。一船到地。貨人棧屯矣。則回貨即宜齊備。而後可以定期回船。無拘滯之費。無失時之虞。否則不獨所操之機將失也。因而折閱

者有之其出入數鉅不可不謹也是故其事必公司而後能爲之使以私家之商彼一人之財力固有限也則不能於印度各部徧置棧屯廣設綱紀責其先期而收貨後期而取錢而前謂拘滯失時有不能免者矣顧自我觀之以謂印度商業未嘗以私家獨爲可以謂印度商業必專利公司而後能爲不可夫商業大者其中莫不一幹而衆支支者所以爲幹也收貨取錢之棧屯綱紀者支也造船到步來去必時者幹也私家之力既爲幹矣而又爲其支不數數之事也然使一國之民其母財之饒衍其分功之繁密足以興是業而無不及者則必有或用其母財以爲幹或用其母財以爲支兩者不相謀而常有相得之用印度商業何以異此當此之時將有人焉以身居各部出其母財爲大商擴貨爲業者矣又有人焉以身居歐洲出其母財爲衆商運貨者矣時會既至其局將忽然而自成尙何不可之與有即如今日歐商其在印度占居之各部凡公司專利者莫不據此以爲己私焉自我觀之則固不若歸之國家設爲保護俾商旅者得以自由營業其中之爲便也此又合而私者不若散

而公者之一端也。假使由吾之道。因任自然。有時母財之自趨印業者。爲其幹則不足於支。而有或所言之弊。是即可證當是之時。其國雖欲與印通商。時猶未至。力猶不及。與其以令勉而爲之。固不若止而勿爲。脫有所需於印產。於其鄰取之而不自致。雖或稍昂。尙未失也。蓋一國母財。只有此數。方其見少。不能以法使猝多也。激之外出。其內必虛。徒食商印之名。而本國生利之功。有甚重甚急甚宜者。將從之而失母財之養。此其所喪。以比其起於用印物產。因仰鄰而價稍昂者。豈可以同年而語哉。

海通以來。繞非洲東印之濱。經歐人所設步者。降而愈密。顧以比南北美殖民地之繁富向盛。則尙不逮也。夫所謂東印者。非必古之天竺。紅海以東之海國。時俗皆以東印之名概之。一凡僅稱印度者。與此有別。一東印南非。大抵皆野蠻無化之國。而比權量力。則實比美之土番爲強庶。而難以侵凌。蓋非印諸蠻。至下者皆游牧國。而美洲土番。則皆引弓射獵之民。非洲最劣如浩登陀。游牧種也。而美之不射獵者。獨

墨西哥秘魯二者已耳。夫壤之肥磽廣狹同，而所容射獵與游牧之民數多寡大異。故歐人之所以待非洲東印者，不能以待美種之術待之。待美者，毆其民奪其地而耕之，而非洲東印則不可以其戶口已稠故也。且專利公司之術，欲使占地之旦夕增盛難，獨波陀噠爾往者立步不用專利公司，故雖民鬼政荒，而其國前立步頭如剛戈如安戈拉邊古意拉之在非，如戈亞之在印，皆彷彿可與在美之歐屬比隆。而波民在彼之重養子孫者衆也。至於海步最大而要者，一爲在非好望角，一爲東印之巴達維亞，皆荷蘭人之外屬。二者之形便，實於海步中稱首者。好望角之土番，其無能孱弱，幾同美番，而其地則當歐印之衝，爲中途之逆旅。舟往返歐印間，皆於此少住，樸枲果酒，歲之所銷於舟船者至衆。巴達維亞之於印度支那，猶好望角之於歐洲印度也。船由印度往支那日本者，則以此爲中候。且其地不惟爲往來之衝，而已實則爲南洋諸島之都會。故其泊之內，舟之自遠而至者，若支那若日本若越南若馬刺甲若暹羅若悉利畢，皆會焉。以二地之形便如此，故雖有專利公司之害，而

繁盛自如也。

案當斯密氏之世。好望角星加坡諸步。尙爲荷蘭之外屬。至嘉道間。則英人皆奪而有之矣。蓋拿破崙出而蹂躪全歐。荷蘭降爲法屬。法之水師。一敗於埃及。再敗於地中海。三敗於西班牙。毀英海權之策不行。而英轉以其時收東印非洲之外屬。後幾百年。英人舉歐亞之商利。全而有之。國以大富。而餘國莫能與之爭者。謂非拿破崙有大造於英。固不可也。

英荷二海國。於東印所立之水驛。海步至多。而其所以統治土著者。則純以專利公司之術行之。華南群島。徧產辛薌。爲荷商之大利。每遇昨年。慮其產多而利薄。則聚而燔之。其殄天產而害民生如此。其所求至諸島。則出屈錢。聽採丁香白芷等之。發露芽蘗。毋使野生滋蔓。故至今幾濯濯也。其所居島中叢生之樹。亦以法摧斲之。不使過多。蓋防土人采擷私賣他國。商人故也。彼以謂最善之法。在使所產者。適如彼之所收。而所收者。常可以持甚昂之市價。其自爲可謂周矣。而其地坐此民生彫

喪乃戶口日微存者僅足以治地畝漁致土鮮以供寄居之旅人與夫海船往來之過客餘且無以自存此非荷人之所恤也此其酷虐實過於往者之波陀噶爾何則當波人據彼之時其戶口固不如是之寥落也至如吾英之占居印度也其在孟加拉禍尚未至如此之烈者特時未至耳顧既有專利公司而統其地治其民矣其必至此者爭早晚而已步必有行行必有長其勢力行於一方如小諸侯然每有數百千畝地盛種爲粟矣行長一言及犁淨盡更種稻田（天竺宜稻）不知者將謂此其意爲民食也則大謬不然其實因行長之鴉片罌粟在屯惡此之侵其利使價下耳故有時平時千頃良苗方新用彼一言亦蘊崇之而栽罌粟於此則又以新種之爲粟爲大利也英人設爲公司以專印度之利而公司中所用之紀綱如行長之屬則又欲取印度國內小支商賈之利而壟斷之果使其術大行則印度物產凡可以銷諸外方而得利者欲其不若荷於香貨之所爲不可得矣如此則一二百年以往印度之民之受害於吾英者其烈殆不減於馬刺甲所受於荷者噫東印之民何

率而羅鞠凶如此

案歐人之拓外屬也。既盡其利。必殲其民。此不僅西班牙波陀噶爾然也。英荷之所爲。有過之矣。顧英治降而日脩。而西波之改革者寡。此近所以有古巴斐利濱之事也。鴉片之貽害泰東。英人雖有三尺之喙。其無可辭。論其功罪。彼前救黑奴。與此僅相抵耳。讀斯密氏所言專利公司之害。辭氣於英人不少假借如此。遁知論事者顧私失實。則其書可焚。又何足與言明理也。

今夫得一國之地而君之。而忍於害民如此者。彼固曰。惟爲此而後有利也。而不知其不利莫如此。蓋天下無論何國。其君之財賦。無不求之於民。既求諸民矣。則惟其民日富。其產日昌。手足日賒之收。百倍曠昔。夫而後出以供其上者。不啻而日多。故進其國殖者。所以自進其君之利源也。然此猶是泛言天下者耳。而吾說於英所主之孟加拉爲尤摯。何則。孟加拉之所收於其民者。大抵皆田賦也。田賦以田實之多寡貴賤爲比例升降。而多寡與貴賤二者。皆消息於市場之廣狹。蓋產之多寡爲供。

供必劑求。故所供之多寡。視中求者之多寡。而價之貴賤。又視欲得者爲競之淺深。也是故爲一國之君。不自顧其利則已。果使自顧其利。則莫若爲國產擴極大之市場。欲擴極大之市場。則莫若使商道之大通而無沮。大通無沮。而後競深而來市者。極其數。不獨專利。事較之宜悉除也。關市之譏征。凡可以塞百畝通流之機於吾國者。必無使存焉。不獨出口之稅宜至輕也。他國之產。必入吾國。而後有以爲易者。亦不可畸重也。夫如是。將見國產之殖。必數廣而值優。而其國日以富。夫眞富者。國之人各足分顧之謂也。而租賦者。國君之分顧也。安有衆人得而彼獨喪者乎。

案此段乃論語百姓足君孰與不足之眞注解。宋以來此題經義。無如此之精闢詳確者。羅哲斯曰。斯密氏之言。不徒見諸事實而已。以理推之。固千世如一日也。蓋國之財賦。必供諸民。而供諸民者。必其歲入之利。仰事俯畜之有所餘。而將弄之以爲蓋藏也者。是故君上之利。在使民歲進數均。而備物致用之權力日大。求其如是者。莫若使貿易自由。自由貿易非他。盡其國地利民力二者出貨之能。悉

賈商之公平爲競。以使物產極於至廉而已。凡日用資生怡情潛智之物。民之得之。其易皆若水火。夫如是。而其君不富。其治不隆者。殆無有也。故凡貿易相養之中。意有所偏私。立之禁制。如率較沮抑之爲。使民舉手觸禁。移足犯科者。皆使物產騰貴。而反乎前效者也。

而印度公司之爲制。則以商爲君者也。以商爲君。有商之心。無君之度矣。彼公司者。方以買賤售貴爲正業。而一切長養治擾其民之事。乃所以輔其商業而爲之。所以使買者愈賤。而後日之售可以愈貴。凡以順利而已。此亦自有史傳來人倫僅見之事也。是故其國之內。商者獨君。必盡禁他人之入其境。以爲競。其所收者。必盡其地之所出者。所出者不能盡。則以法蘊崇摧燒之。俾無孑遺。而後貨有限。供劣乎求。可以因所轉售者之市利。今夫壟斷之夫。其所得之利。終亦少耳。顧充其什一逐利之心。若甯有此終少易窮之小利。而其遠且大之利源。合於君人有土者之所爲。彼固固所習之中。而不能見也。故充英公司之所爲。非使所居之國。盡變爲荷人之馬刺。

甲不可。向使英公司之立於印度者。視爲君之驕重。而經濟之業。輕則歐貨之東傳者。彼將務使之極賤。而印貨之收於其土者。亦必使之有以存養民力。而目爲其可貴矣。然而足數者。固非商人之所能爲也。商與君利反。君之利與國若民之利可合也。商之利與國若民不可合也。

案商業苟自其大者言之。其與國若民未嘗不合也。蓋商之大利。亦在銷售之日。廣求者之日多。所收者日以薄。所種者日以遠。如此則與有國者固同。當斯密氏時。英之民豈獨商者遂小利而已。而彼治國者。亦未嘗有遠慮。故惟知以法使一貨之價常高爲利。而不悟價高而求者少。因遠遞價賤而求者多之利也。

印度占地之政體。自其由歐之制便者言之。其背理而不可擬。已如此矣。顧自其在印之施爲。指注者觀之。其背理乃更甚也。蓋其施政行法者。必衆商賈爲之。夫商賈固多可貴之人。獨至使之收民。則無論施之何邦。皆不能爲民所畏象。是故責其服從。非輔以威力不可。此公司所以有額兵。而治理如東洋。薪令莫予違。僉專暴而不

可聞矣。夫英人之居印度者，始本商賈也，乃後出治之權，而一人之身兼商將吏三者。此又有史傳來人倫僭見之事也。雖然，彼之正業，則辦商賈也，違本國主人之指揮，有貨至自歐者，則代售之，歐有所需，則代斂之，依然市井之事也。售則必極其昂，斂則必極其賤，由是而非斷其市，禁他人之人爭，必不可矣。彼方以吏治辦專市之微權，故極其效，必使國中自然之利，日以益衰。至於所產之額，僅等於所樂轉輸者而後可也。

且此爲人儲屈而執其地之治權者，不僅爲其主人勞已也。蓋大抵莫不私販而非主人所能禁。夫集群力以立至大之公司，用儲屈於億萬里以外之海國，其所行者，主人目不得見，耳不得聞，而謂如是之人，乃以主人有言，決然各置其私，身處脂膏，不思自潤，寧其甚便之勞，怡然自足於有限之俸糈，世無廣賈，則惟至愚極固之夫，而後作是想耳。利盡於中飽，而美以爲公者，其數有限，故雖儲屈者之俸糈甚儉，而其勢不可復增。於此之時，設禁私販於公事，無裨益也。徒使其中綱紀，益趨於主

人之令以魚肉其所屬之小傭耳。且公司既以專利之術行於東印矣。則上行下效。是私販者亦欲以專利之術坦然行之。其所指意經營之土貨亦將禁他人之爭收。此雖背理自私。然尙未爲害民之刻酷者。假令主人有令。禁不許爲。則彼將別求其所以專之之術。事則隱而途益曲。其貽害於民愈有不堪問者矣。蓋爲此者。固更而操兵權者也。彼之營利意有所屬矣。而他人先之。則挾其吏勢奮其奸威。何所不至乎。一英人馬可理有克來福傳其述此事甚詳。一故傭者之專利私販也。不禁行。禁之亦行。而其禍加酷。且彼既販其私矣。則所專之貨產不盡於公司之所已專者已也。公司所專。不過歐市之所銷者。而私販之所專。則取其國內所通之貨。擇肥而專之。故公司之所因。而不令廣出多供者。不過歐市所銷之出口貨。而私販之所盡。常抑之不使暢盛者。大抵皆民生甚急之資。然則私販行而印度之田疇坐以日荒。戶口坐以日耗。而公司之傭雇徒計已利之盈細耳。至印度民生之彫瘵。固未嘗一概於其心也。

雖然彼之所爲固何足怪蓋印度之棄占地日廣而成國而是國者公司諸主人之所有而非傭雇之人之所有也故以其地之國計民生之休戚責之主人可責之傭雇之人不可且主人之利果明其理則將見其無往而不與國從同彼惟開此而利慾中之是故虐之如此耳而傭雇之人之利則斷乎不與國同者也故雖知之至真見之至灼其作虐淫威猶如故也公司所定章條雖不必善要其用意皆美至於居東者之所自定法之良否不可知而章之美否則無待深論而可見也夫治人一國身爲官吏於其中其摛載搜括者惟恐不多其求去也惟恐不早若謂既去之後雖其國地坼天崩民物蕩析於已固無與也者此真自有家國以來不數數觀之官長矣

吾之言於彼公司所傭雇之人非有所私毀也非於其人有所私憾也吾之所致責者在其法制與其所處之地形而不在行其法與處其地之人也夫人困於法制而見推致於所處之地形者雖心甚非之口怒訶之及其行事不必愈於他人者有之

矣。何則？身與其際，勢或不得不行故也。彼馬都拉斯與錫羅屈閣之政府，所以處戰
靖之宜，其智勇謀斷之雄深，雖當羅馬民主極盛之時，其見於民會幕府者，殆無以
過。而二政府之人，幼之所學，壯之所行，皆非道國詰戎之事也。而其所成就功業，卓
卓如此。然而彼所成就者，非由學問閱歷也，亦非由師資則倣而能之也。特以所處
地形，事機所會，忽然而成。雖才智剛果，震耀一時，以之前叩其人，亦不自知也。夫法
制地形，既能使當其際者，成大美之業，而其始願者不自圖，則有時事效反此。其行
事爲世人所詬譏，亦謂之所不自圖，何不可之與有？故曰：吾所資者不在人而在法
地。（當斯密氏言此之時，英人克來福已建大功於印度，故其言如此。）

究之專利公司，終有害而無所利。既不便於專之之國，又大害於所專之區。彼新開
殖民之地，與弱國小夷，不幸而遇此者，則弔之可也。

篇八

結論商宗計學之旨

商宗計學所據之以經緯一國之財政而顧其民之日富者要之不外二術而已曰勸出貨也曰沮入貨也雖有時亦反其道而行之其宗旨則未嘗變也曰常以求進出差之必正勿負而已故國產固以多出行遠爲佳而生貨則非所勸而或沮其出口者有之矣蓋生貨者工業製造之材用也必使國中材用至多而後製造熟貨能本輕價廉有以敵他國之所出者而占銷之材用而外尙有不勸其出者則工作之機器也其爲此者用意蓋同大抵務熟貨之日廉已耳故其沮入貨亦沮熟而不沮生而吾嘗考之官司之計最尙未見有勸獎機器入國之政者此緣工業日盛以來機器亦爲大宗之熟貨使其獎而勸之恐侵本國製造之利故也故其所以待機器者與物材之生貨不同不特不獎其來且恆有禁其至者此如織業之蠶梳是已其進口也惟愛爾蘭外此皆在所禁之列者也此令昉於義都活之三年額理查白三十九年重申禁例至於今則著爲永令矣

案歐洲各國之於進出口貨也務出熟而進生所以求民自食其力之易也獨中

國之通商不然。其於貨也常出生而進熟。故其商務尤爲各國之所喜。中國士夫高談治平之略。數千百年來。本未嘗研究商務。一旦兵敗國辱。外人定條約。捐紙尾。督其署諸。則謹諾之而已。不但不能駁。即駁之。亦不知所以駁也。所以稅則者。有國有土之專權也。而我則進出之稅。欲有增減。必請諸有約之國。而後行。國之官事。晉用楚材。古今有之。而未聞監權之政。付之他國之吏者也。且古今各國之用外人也。必有人棄本籍而從仕國。功賞過罰。可以加諸其人之身。方其策名而授之以政也。有盟詛之禮。有易服之制。故雖爲異產。而其人則可用也。而今則執我至重之稅政利權。而其人則猶敵國之臣子也。所操者吾之政柄。而受封爵於其本國。立嚴約密章。禁吾國之人之爲其屬而入其藩籬者。而其所監之稅。又其本國者。居什八九焉。嗚呼。此真斯密氏所稱自有史傳以來人倫僅見之事者矣。易曰。作事謀始。吾之所以爲始者。既若此矣。又何怪金鎊之價。貨物之情。大異於昔。而吾欲取其舊者。稍一更定而不能也。（此書成於光緒二十六年。故如是云。

云、夫中國雖於今爲粟國、而終爲外人所嚴憚、而恐爲其子孫憂者、有二事焉、一曰土地廣大、物產浩博也、一曰民庶而勤、作苦治生也、以是二者爲之資、設他日有能者導其先路、以言通商、則轉物材以爲熟貨、其本輕價廉、以奪彼歐人之市有餘、以言兵戰、則堅忍耐戰、人懷怒心、決非連難爲樓者所可及、而是二者之中、其前一尤爲歐人之忌、故吾今者之故步自封、雖笑譏鄙夷、而實則彼之所將視以求者也、設一旦吾之民智日進、天誘其衷、幡然改之、吾知彼方奮其沮力、以與我爭一旦之命、其必不坐視以聽我之精進、又灼然可知者矣、嗟乎、二三十年以往、假炎黃種族、猶足以自存、則吾之所以與彼力爭者、方熾、立後來之基址、不難、去當前之阻力、難、去當前之阻難矣、而救前人之失計、乃尤難也、顧此數十年之間、將瓜分魚爛而破碎乎、抑苟延旦夕而瓦全乎、存亡之機、間不容髮、視乎天心之所向、亦深係乎四萬萬人心民智之何如也、後此之變、將不徒爲中國洪荒以來所未有、其大且異、實合五洲全地而爲之、夫豈不佞區區之智、所能逆觀而

預策之者哉。雖然有可知者。曰順天者存。逆天者亡。天者何。自然之機。必至之勢也。閱今而考古。格物而致知。必求真實而後已者。凡爲此耳。夫非妖祥咎徵之謂也。吾黨有志圖存之士。其求深識此所謂天者。

其獎進材用之入國奈何。則有時而免其應出之征稅矣。且有時而施之獎令矣。此如各國所運至之羊毛吉貝。未凍之麻。染色之藍。熬又如外屬所軋之皮革。格林蘭漁業海貉之皮。屬礦所開之頑鐵。如是百十事。使遵令格而入稅關。則常關所應征者。以優獎招徠之。此雖商工二民之私利。其勢力有以使議政者造寬大之令。以縱貸之。然其政尙平公而合於治道。使其平等待物。則凡製造之材。實亦皆可以邀免。而國則將以益而不以損也。

稅之所免者。始不過物材而已。以製造者求利之無已。則往往並不涉物材者而亦求免之矣。如往者之燕紗。其由莫斯科哇至者。例每百鎊征二鎊十三先令四便士。其由法國荷蘭至者。例每鎊征一先令。至若耳治第二之二十四載。悉減而爲每磅

征一便士焉。可謂至輕矣。而操麻桌之業者。猶以爲未足。至其二十九載。則並此而蠲之。而同時英產麻布。且邀出口之獎令矣。不知麻桌之業。織之功省而紡之功繁。其栽種澆漑之勤。姑不具論。而一人之織。必有三四人之紡。而後相及。故一麻布成。五分其功之四。乃在紡紗者。而如是紡紗者。類皆貧窶婦人。散處國中。不蒙顧恤。而麻業主人所售而得利者。乃織成之布而非紗也。彼求其利之豐。則買紗之惟恐不廉。猶謂布之惟恐不貴耳。故其於布也。已造者有出口之獎。外來者則從而重征之。至於法國之產。則直禁絕之而已。凡此皆欲布價之極昂也。至於其紗。則惟慮外至者之不多。務奪貧民之利。使之不可復貴。織工之庸極其非。市紗之價極其廉。故其爲熟貨之貴而生貨之賤者。非爲國之勞力小民計也。所欲富厚者。愈趨富厚而已。商宗計學之道。究其效而言之。大抵便於強有力者。盡如此矣。至於貧苦勞民。什八九被其摧抑者也。麻布之獎輸。並紗之免稅。原定皆以十五年爲限。而業工商業。力求寬展者再。故二令皆以一千七百八十六年六月二十四日議院散會時罷也。

獎內輸之政多施之材用生貨而其產又大抵由美屬如本埠之初則獎船材若桅杆若麻苧漆油之屬一也若耳治第二之二十一載則獎美利堅之靛青每磅獎六便士二也若耳治第三之四載則獎美利堅之麻桌每噸獎八鎊三也其五載則獎美利堅之材木每五十立方尺獎十二先令四也其九載則獎美利堅之蠶繭生絲每百鎊之值獎二十五鎊五也顧養蠶功繁而美之人功又貴故雖有獎令至者殊寥寥也又如其十一載則獎盛酒之木箱等每若干獎六鎊六也其十九載則獎愛爾蘭與美利堅之麻桌尋又以有損本英之栽植而廢七也以上諸獎令皆有年限而同時自他國至英者則征之如故蓋英人以謂美本英屬美之富即英之富也財之輸美者無間少多皆有所還故於美雖有邱山之費而於英實無毫釐之損且英既以美爲外府矣則所用於美者皆以使吾英之利進云爾此其持論至愚固無假我之深辨即近日英人之所閱歷當有以使人人眼明不若前者之夢夢矣即令英美之間無幾微之異則前者獎內輸之政將與獎國中物產者等義而同功願獎內

產之政未必皆無弊也。矧乎其不然耶。

禁物材之外流其法有二。或明設條令以禁之。或設爲出口重征而使之不禁猶禁。夫吾英之所禁出者見於羊毛最詳。而法亦獨重操屠業之工商。謂朝廷曰。國之利否視吾業何如。而議者之聽皆聳。彼所專之利不獨使外國之屬不得並行於國中。也。而牧者之毛毳亦懸甚厲之禁。使之不得遠運而他售。夫國家嘗嚴關出之禁矣。爲此者所以重邦賦也。乃議者輒譏其太密。以爲蚩氓何知。禁紛則向之所習者。今皆爲罪。此其說雖不必中。要皆爲惠保小民發耳。然自我觀之。則關出之禁雖有至嚴。其厲民之虐不若工商二業所譁請於政府而得之以爲專利之資者之已甚也。嘗聞杜拉戈之律以血寫之。如羊毛之禁乃眞血律耳。額理查白之八載令曰。此後有白羊若其羔出國者。初犯者沒其資本。永遠入官。監禁滿一年。斷左手於市。懸以示衆。若再犯者以匪倫尼律論殺之。一歐律第一等罪號。咳吐利孫次之。爲匪倫尼咳吐利孫死。匪倫尼籍沒資產有死有不死者。如謀弑國主爲咳吐利孫而侵奪國

主權利爲匪倫尼如盜鑄錢私交外國棄師毀械焚燒城砦等事一其爲此者蓋恐羊種善者爲外國所孳生故耳至察理第二之十三載以羊毛出關者亦以匪倫尼論籍其家使吾英以人理爲國是二令者吾望其雖著而不行也考之國故其第一令未經明廢然至察理第二之十二載乃更令云有以羊及羔出國者沒其羊及船舶羊每頭加罰鍰二十先令此爲新令則其舊者雖不廢猶廢矣其第二令則威廉第三之七載所廢顧二令雖廢其所留而存者其嚴切已爲民所不堪設今有以羊毛出口而被捕獲資本沒官矣其每磅羊毛例加罰三先令則五倍毛價者也且犯此者有所貸人皆銷之不得索逋就令其人巨富被此者至於赤貧可也三月之內無力納鍰則流七年年限未滿私還者以匪倫尼論死臨死不令教士爲禱請船主人知情者沒其舟若器具舟師舵工沒其資監三月尋改爲六月其苛燒如此所幸人心之殘忍未若立法者之刻深故其令雖懸而以之乘人者尙所未聞也以其關出之禁嚴而內地之轉輸亦因之而大不便羊毛之轉運也例不得以箱筭

箛篋等必以皮褰布褚外書羊毛若毳紗各字字大徑三寸以上違者物沒官每磅加罰錢三先令晨日未出晚日既沒其距海五邁以內地不得以車馬裝運抑人力負擔之違者貨物車馬沒官其海墘村落百家連保有羊毛自若過其地以出者值在十鎊以下罰二十鎊過十鎊之值則三倍爲罰保中有二人犯者則罰百家分任其訊理之費其有欲法輕縱者監五年人得告訐之此律行於通國者也

其在英南庚德薩什格斯二部其用法尤苛距海十邁以內之羊主人於落毳三日之先必親書狀告其地之監權者狀中毳多寡屯儲何所皆署之有所售售幾許購者誰某居何地將運某所必以更告距海十五邁內居民欲買羊毛者必先赴部吏若縣令者署狀約所得毳非以更售距海十五邁之居民而後可無約之貨有由內地運往海墘者貨沒官每鎊加罰錢三先令其無約而在十五邁界內屯者罰與運者同科貨經吏獲其有約者許持約索原物其僞三倍加罰餘罪依例

夫內地之轉輸既以糾繞苛煩如此則沿海之商務亦緣此以多窒而罕通業毳之

商運致羊毛至一海口。由是海口更輸本國之他步。必先告官。重幾磅。標徽爲何。苞裹幾箇。纖悉以白而後可。有非然者。貨物車馬舟帆。皆籍沒矣。威廉第三之元年。登令曰。有羊毛之家。所居距海。雖在五邁界。其由圈剪毛。輦運至家。不在此論。惟落蠶十日之後。欲移屯他所者。必赴權關。親署羊毛若干。及所屯處所。方准移運。其先移後署未逾三日者。亦准免議。云云。大抵蠶欲出此口。必先聲明所致之他口。而到口開船之頃。必請權吏監視之。方准登岸。否者不獨蠶及牽連之貨。將致籍沒。而加罰之錢。所謂每磅三先令者。亦不免矣。

凡以上之鉤釵析亂。大抵皆剝業之所爲。務使蠶不外流。而剝材恆賤之故。然其能贊議院之聽。而設此迴山人情之條禁者。以其云英蠶品質獨絕。甲於他邦之所產者。且他邦所產。非得英蠶雜而用之。不能成中屬。而上屬之非此不成。又無論矣。故使英能絕蠶之出口。將坐而壟斷天下之屬利有餘。蓋獨絕之物。人莫與爭。價之高下。其利在我。此天成之美利。得之而進出之差。永永爲正。富國之謀。莫若此之操券。

者是說也。當時持之至堅。而和者亦至衆。即至今日。吾英之人。尙什六七。謂其說無可疑也。顧一倡萬和。大抵於屬之商務工業。毫無所知。否則以耳爲目。未嘗身考而歸論之者。必求其實。則前所云云。舉爲謬妄。欲成上屬。不特無待於英。且用之而上屬不成。歐洲呢屬佳品。必用西班牙羊毛。雜以英產。則縷總不純。品質斯下。蓋實事之與人言。逕庭若此。其多爲謬說者。樂揚己而中於專利之私。故不暇深察也。以其禁例之紛。而英之羊毛價減。不獨劣於應售之價而已。以較義都活第三時。其價亦不若也。蘇之羊毛。原得自爲風氣。乃自南北既合。同被遏抑。而其價僅存往者之半矣。斯密約翰於羊毛一產。考訪最詳。據云英上等羊毛。價實劣於荷蘭下等之羊毛甚遠。如此。則彼操屬業之家。可謂如願以償。得其所祈禱矣。蓋彼之所以爲此。紛煩者。無他。正欲羊毛賤耳。

向使因任自然。而不加以紛擾。則英國羊毛之市價。必不如是之卑卑也。故時俗有謂以令之故而價微。亦以價微之故而羊毛之產乏。月計若少。歲計則多。雖不必甚。

舊時而實則陰受其損爲不少矣。然自我觀之。則所見異是。竊謂禁令雖紛。而所歲殖之羊毛。則不必因之進退也。蓋羣之多寡。視殺羊之數。而殺羊之家。其斥母勞力而爲之者。不必皆爲羣而後有事也。彼之所爲。視利否耳。而利之資於毛者。不若其資於肉者之多也。一羊之入市。有所不足於毛者。方且取盈之於肉焉。故禁令之行。其使毛革賤者。無異乎使肌肉貴也。打牲之事。以已治之地。殺致牛羊。其所收之價。必有以資地主之租。與夫具母業牧者之贏利。假令不能。則打牲之業將廢。故所不收於毛革者。必於肌肉焉取之。此愈減則彼亦愈增。牧者之資利。但計其全。而彼此多寡進退之間。則因彼所不計也。故國之田疇既闢。如吾英者。羊毛之禁。例雖紛於田主牧人固無所損。而損者則食肉之家。將舍賤而得貴耳。且由此言之。羊毛之價雖賤。將所產不因之以虛。獨毛賤則肉必貴。肉貴則市肉者沮。市肉沮則銷數銷數則產隘。然以吾英言之。雖其理固然。而其效則不必見大。何則。食肉者多。不爲貴價竟沮故也。

或又曰。凡物產之進退。皆有品量。二者之可以分言。精粗美惡品也。大小多寡量也。前所言者。量也。其不以禁令之紛擾。以至於消乏。固矣。第羊毛之品。得毋因之而日下歟。蓋毛之品質。視羊種高下。牧地肥磽。與夫護視之勤否。淋浴之數疎。牧之爲此者。爲蠶利重故耳。今令既使蠶廉。廉則得不酬勞。而爲蠶之功舉廢。如是而百年。則蠶品之日下可知也。乃自令設以還。羊毛之價。則日賤矣。而羊毛之產。不獨量之不減也。其品亦未聞其加劣於前。且若有進者。是又何也。曰。此自易見耳。蓋羊毛之佳者。不得獨毛作也。其大半則係夫羊之肥瘠。如夫其種之大小。羊之肉既貴矣。則牧者意專爲肉。而其毛不期而自佳。夫使毛價不降賤。則其品之日佳。將不限此。然但肉貴。則自有以使毛之不日劣而日良。物固有意所不存。而相因而得益者。此類是已。則吾英羊毛之不降惡而日善。又何疑焉。

是故蠶令之紛擾。於蠶之歲殖品量。二者雖不能有所助。亦不能有大傷。雖業蠶者之利。以令紛之故。不克歲以豐滋。而事有相救。利有相生。則舉其全而計之。其受損

之微有始願所不及者矣。

雖然以其不能致損之故遂謂羊毛出口之可以禁絕則大不可謂羊毛出口得加重征可蓋國家之於其民無所重輕而莫不愛者也爲以一民之利而損此一民之利此非爲民上者之所宜出明矣今者取國之羊毛而禁其出口致其價劣固明於業蠶者有所損也而問其故則曰此業蠶者之利則不中之令也既爲一國之人民無論爲君主爲民主其宜有所出以急其公也則同今使取出口每包之羊毛而加之以五先令若十先令之稅國賦之進由此實多此於業蠶者雖損必方之於禁遏爲已微蠶價雖賤必不若禁遏者之已甚也而業蠶者之取材雖不及禁出者之甚賤而較之外國之取者終有此每包五先令若十先令之利也況夫尙有運輸保險之費之不必出是業蠶者雖損而猶甚利也夫徵一稅矣欲擇其於民無大損而於國有其利者難而羊毛出口於今日之英則其一也。

案羅哲斯曰取出口羊毛而加重稅者見一弊而更其端使見此者轉爲見彼謂

爲去弊必不可也。蓋出口貨之稅出之者非受貨之國也。出於受貨之國者必其貨爲一國所獨產。且其用而銷之也。欲代以他物而不能。既爲受貨之國之所必需。且用之既極其儉。而不可復撙節。有如是者。則取出口貨而加之重稅。重稅實於彼乎。徵之矣。然而天下百產之中。其爲如是者有幾物乎。中國海禁初通。茶葉之於各國。庶幾爲此一。既非此類之物產。而重其出國之征。則其效將銷數比例而見少。而前之產此。其收利僅足以周租庸息者。將緣此而不存。而產數亦以細矣。斯密氏既知羊毛禁出之害。而以謂此法可用。不知加出口之稅者。比之禁絕出口。猶五十步之於百步。非所謂除弊者矣。

事更有出人意者。蓋令之煩苛如此。固欲以禁其出國也。乃令雖苛。罰雖重。而羊毛之出於英者。如未嘗禁也。民固有嗜利而不畏刑者。自禁其出口。而國中。之價與外市之價相懸。價懸利重。則頑民甘心之。而苛禁有不及者。關出之利。得之者偷漏之頑民也。於餘民無所利。而使弛禁而爲之征。將賦以此充。而國用既周。則他稅之

累民病國者可以少減。如此是奪頑民不法之利而以利通國之人矣。

有碌礪泥者爲織刷所必需。所以接浮煩櫛。使光緻也。其出口禁令之嚴。與羊毛幾相若。碌礪泥與燒製菸斗之白堊相混而難辨。詰者常指碌礪泥爲白堊運出之。由是遂取白堊而亦禁之矣。

察理第二之十三載。皮革出口。無論已割未割者。皆禁之。惟製成鞞履乃不禁。如此是許業履業鞞者以專利。而牧人割工皆困矣。繼而治皮者約爲工聯。於每石皮出一先令稅。而其禁以弛。且出口之頃。其所前出他項稅。得掣還三之二焉。其以皮治熟貨者。運出例免稅。而悉掣還舊稅。其優如此。割牧人爲所困如故。蓋牧本農業。散居都鄙郊甸間。其勢不便於爲合。不若工業者聚族邑居。其相約爲聯。保守業利。勢至便也。尤可哂者。以牛角爲生貨物材。亦禁出國。而微業如治角之工。比疎之匠。亦皆以熟貨故。專設牧者之所產。而廢其利焉。

貨介乎生熟之間。其出國也。非禁絕則加重征沮之。此不僅見諸皮革已也。蓋其貨

雖未盡生而不皆熟。猶有少工之可施。則吾英之民曰。是必自我乎治之矣。是故羊毛禁矣。而蠶繅絨紗亦禁出國。即至素布之可以爲衣。其出口之關征亦重。則國之業染者欲專其利也。繅工多兼爲染者。故未若前之治皮者結聯以抗也。時表甚僂之外郭。與二者之瓷面。皆分功而爲專家之業矣。顧其物產亦禁外售。蓋業時表者僂者。慮其銷市之廣而價增。使己利微故耳。

考義都活第三顯理第八義都活第六之舊令。諸金皆禁出之產。否者獨錫與運。則以其物至足之故。而當時以輸此爲業者亦多。威廉馬理亞共治之五載。以欲勸厲井業之故。則弛銅鐵出口之禁。其雜銅若所謂鐘齊礮齊殘齊之屬。則至今未弛。銅器出口者例無稅。

至其他物材。無出口之禁者。則重其出口之稅若耳。治第一之八載。英產出口者。大抵免征。其不免者。若連錫皮革煤炭羊毛白蘭膠諸革鞣毛蠶馬等。此類舍馬爲牲畜而外。大都物材半熟之貨及工器耳。同令於染草至自外國者。亦獨其征以勸之。

且運以更出則有稅。蓋操染業者以爲惟如是而後染草不貴也。然而不得其所願者。則以運此者常謹其供。不令稍過。染草日少。轉貴於前焉。沁尼葛膠者。染之一物也。出於阿非利加。其地爲法屬。法人率權於其間。至一千七百五十五年。英奪其地。亦取其產而壟斷之。立條禁與北美之冊貨等。膠每石入口。征六便士。若更出。其稅至石一鎊十先令。蓋業染工者。以此壟膠於英國也。然以關稅日重。關出日多。雖有厲禁。莫之能止。且其往荷蘭者。大抵由沁尼葛運運之。故若耳治第三之十四載。亦減其出稅爲石五先令云。

鼯鼠皮。英人以爲冠。稅則之簿。計其價每張爲六先令八便士。其進口稅爲十六便士。以其待需之急。故其稅爲過重。則更定其進口稅爲六便士。繼而英兵戰勝於外。得產鼯之地於北美。則列其皮爲冊貨。而英人專有之。英之冠工。猶以是爲未足也。則請更定其進口稅爲一便士。而出口則每皮七便士。不得擊還舊納者。

煤製造者所必資。則亦加出口之重權。今噸征五先令。(一千七百八十三年事)

所征過於在山之煤價。即出煤海口。其價亦劣此也。

至於製造機器之出口。則以重稅爲不足。且明禁之矣。威廉第三之七載。令有以織機及手衣之機器出口者。抑起意運出者。機物沒官。罰銀四十鎊。其半歸國王。其半與告者。又若耳治第三之十四載。令有以棉麻絲絲諸業所用之機器出口。抑起意運出者。機物沒官。罰銀二百鎊。裝運之船主知情故蹈者。罰同前數。

夫律於死器械。且以致嚴如此。則於巧匠之生人。其益嚴可知矣。故若耳治第一之五載。令有誘國中各製造匠往外國傳授方術技藝者。初犯罰百鎊。監禁滿三月。完納罰款釋之。再犯所罰銀數。臨時理官定之。監禁滿一年。完納罰款釋之。至若耳治第二之二十三載。更令初犯罰五百鎊。監一年。再犯罰千鎊。監二年。完納禁款後釋也。若其所誘之工匠。則案定時。其保結期永世不得出國。若不遵。則監禁之。其已往外國。以方術技藝教授他人者。經本國使臣若領事官察出。則傳語令返國。限六月內歸。具保結約不復往。不遵者。其人不得受祖父及親友傳業。有田宅財產。悉籍沒。

之不復爲本國人民。亦不爲國律所保護。

案自咸同以還。中國各省大吏。有講求製造船械槍礮者。有興礦務農工者。有爲機器紡織者。不獨其器來自外國也。一局既立。一教一匠。少者數人。多者百十。皆厚祿重糈者也。於是議者曰。西人固無巧。西器固未必也。誠使巧且利乎。則人情不甚相悞。彼方閤之以長守其利權之不暇。奈之何出以教我與我乎。且彼族於我固無愛也。無愛而樂與之以巧利。不情不然。則出其粗且下者。以要吾利。而尙有其精且上者。固非我之所能得也。予方垂髫時。時時聞此。即至今日。其言猶未絕於耳也。不知是言也。以謂百數十年前之西人。可以測今日之西人。不可何者。自斯密氏此書既行。民智日開。深計遠算。知其於己之無有利也。謂其必愛我而後教我與我者。猶自仁之事言之也。而彼則以無所利而不爲。其事固自智生也。故不佞常謂世之不仁人少。而不智人多。而西儒亦謂愚者必不肖。無不肖之非愚。然則民智之開。固不亟乎噫。

今夫吾英之民所自詡而亟稱者非人得自由不相陵制之謂乎自以謂持之甚堅防之甚密矣而於前事也以商賈數家之利其自主之權遂已不能自完如此且國家所以從其說而爲條禁者意欲本國製造之業之日張也而其張之之術則在抑他邦者冀其不能而莫予競厥主工師以謂國有良工當爲已所獨畜而既稟之稱事又不樂以有與爭者致日貴也是故一業之技巧其受徒也既限其人數使不可多又爲之徒限使無速化而寥寥之匠指尙不欲他人我先致其業或以失利也多吾聞之物產者以民用而後有生之者以用之者設非用之者爲生之者來也是故保生者之利即所以進用者之利其理至明無待深辨而後喻不然非下愚之夫即商宗計學之爲也商宗之說往往屈用者之利以伸生者之利一若斯民勤勤之爲百工通易之局不以用與食爲歸宿而以生與爲爲本國語有之曰截足以適屨削頭以便冠彼商宗常之矣

夫慮外產入國爲競而禁之此正所謂屈用者之利以伸生者之利也專國之市使

供者少而價昂。價昂者用者之薄而生者之厚也。若夫獎內貨之外輪亦屬用者之利。以伸生者之利也。獎之費必有所從出。而出者衆則留者價昂。如是則用者之利再屈也。既納賦以資獎費矣。又得貴物而用之。非再屈也耶。

英通商條約最爲著稱者。莫若波陀噶爾商約矣。吾民之取貨也。由此必舍鄰國之廉且善者。而取遠方之貴而惡者。雖明知其不便。而不得不然。以遠方納英之所產。而鄰國不吾納。抑納之而價不善故也。顧納不納生者之利否。而用者則不特舍廉善而得貴惡也。國中之貨。坐此而貴者。用者實受之矣。

在歐市之所爲如此。在北美西印之所爲。且加甚焉。一若國家拓疆土建藩屬之事。專爲生與爲者之利而起。而戍守之煩。蠲縻之費。則通國任之。輓近二役。英之軍興。過二百兆。而國債所增。亦過百七十兆。鎊有餘。凡此但以息錢計之。已大過生者專利之所獲。即以每歲運美貨產之全值言之。亦不能遠逾此費也。

前數篇所詳論而直指者。皆商宗計家所詡爲保商之上策也。諸民之中。誰實爲國

家盡此者其必非用與食者之民明矣何則凡厥所爲舉非用與食者之利也自其所利者觀之則必出於生與爲者之家可決也以其事之害國而所欲利者究亦未嘗真利焉此予之所以心重言長欲爲其簡略而不能耳

案斯密氏是篇所指斥者不數十年幾於盡革此非斯密氏之力不及此然亦當日工商之家閱歷之餘頗悟苛察糾紛之令不徒於已無益且貿易之事因之鬱而不舒乃能幡然從之若此易耳善學者於是篇之所述可以得無窮計學之理不獨見百年以往英爲政之人與經商者之識解習非勝是者之難破而害於理財也又以見人心既紊於私則無往而不與真利相左顧吾所不解者英之前人其財政誤矣然猶得曰無人之發其覆而昭其矇也獨奈何生當今日讀斯密氏之書親見英國盡革保商條令而爲自由通商之效矣而輒近北美合衆之民猶有行重內之政策者明知不善而故蹈之是不可解也豈若輩自私之意中之深而不自克歟抑於理財計學之道都無分曉也然所斷可知者其爲害於國將於

古淺而於今尤深其無以自解亦於前人為尤甚也

篇九

論農宗計學

農宗計學者以地產爲財賦之大原而本之以立說者也吾之於商宗計學也爲說有不得不繁之勢理有相形則農宗之說將不待煩辭而可以解且商宗之說歐洲諸國什九宗之見諸實政者也而其害又如彼至於農宗之術則猶未見諸施行而徒存於學者之思議其在法國議是學者皆淵通開敏之士夫故其說甚精而多可采吾試爲學者略析分疏然取摩其壘而循其郛而已矣不能細也

葛魯伯特者法王路易第十四之名輔也其制行方其爲政勤其神識周於庶事其察度支之計最精而爲之之日又久故法國欲綜歲計之出入而釐爲良法使可久行而無弊者莫葛魯伯特若也獨不幸其人以名法起家沈浸於商宗之成說蓋商宗之事主於禁約章程者也彼夙以法制整齊一國之官司使之各有分限不相陵

賄則其素習與商宗之術不謀而自合其待一國之民業也亦準其所以範圍百司者爲之民方自奮其手足心思以各求其利實則宜爲寬大之政而行之以平通公溥矣彼則不然而意常有所輕重或於此而異之以其優之利權或於彼而加之以非常之束縛夫歐國之政家其勸民趨業也邑業常優於野矣而葛則以扶相邑業之故轉而困抑野業者有焉蓋以爲法而欲與他邦爭一旦之命也則莫重於舊工商之業欲奮工商之業必使物材衣食至賤而後能之是故野之所生必資本國轉以外餉則奸民也條禁之弊緣斯而起加以法之舊令已極煩苛田稼之登雖同國異部不相通灌而無藝病民之賦墮地多有遂令本業日以彫疎雖其土地至腴而寒暑雨暘於諸國最爲適中無益也生者降寡民生日艱舉國歎愁莫知其故則食謂惟葛魯伯特之崇末抑本有以致之語曰葛枉者常過直意非過之不足以得適之效也法之鴻生本斯爲義則相與共爲農宗之學以稼穡賦畝爲財賦之源非此則無所出悅服者衆遂成宗風始葛之論民業也其視邑也過重而視野也過輕而

農宗之說亦爲野太多而爲邑太少也。

農宗分一國生財之民爲三屬。一曰地主之屬。二曰力田之屬。三曰食粟之屬。財之生也。總於力田者。而地主之屬次之。至於百工治績。通移有無之民。則皆食粟之屬。童然無所能生者矣。

地主之屬。其生財而有助於國殖奈何。曰在其治闢脩進之事。有地之主。出財致力。以開辟萊汙。抑建倉廩。掘畎澮。繕墜塹。與凡一切獎進地力之事。而力田者由此其用力同於先。其所收或倍蓰之。而地主之租亦以益進。則是租也。謂所費之財之贏息可也。故農宗謂脩田之費曰坪費。

力田之屬。其生財而進國殖也。則有本費與歲費二者。以二費之加於地而財生焉。所謂本費。若田器。若耕畜。若子種。若勞者之所食。新田之始耕。至於登收。皆此費也。所謂歲費者。若子種。若耨鋤田器之所礮損。若備人田畜當歲之食。凡與歲相循環者。皆此費也。力田而有收。既以還地主之租矣。其所餘之利。一復其本費而加以通。

行之贏率二。每歲之中必有以復其歲費而亦加贏率。蓋是二費爲力田者之母財。設非以時復而加贏。則力田之利劣於他業。彼惟有違南畝而操他業矣。且此爲大中至正之利。合於天理人情之極則。居上有土者所宜力爲保持。設奪之以無藝之征。則中正之租。浸假且莫從出。不獨失其無藝者已也。是故租之上下。必定之於二費加贏之餘。租可以上下。二費加贏不可以上下者也。然則租者。雖謂爲田業之完贏亦可。其所以爲力田者生財之實在。此其於三民之屬。所以爲最貴者亦在此。講農宗者。專重之。而謂歲本二費爲能生之費也。

農宗所重者。力田歲本二費而外。莫若田主所出以脩田之坪費。坪費者。亦能生之費也。故田主之得租也。亦必有以復坪費。而益之以通行之贏率。而後其事可以久長。此雖國王教士不可侵刻者也。假其侵之。則地力不盡。而國家與教會二者之徵收。將以歲絀。則適用自伐而已。故理平之國。坪費之復。必盈無虧。則坪費者。亦用財而生。生益廣者也。

農宗計學所名爲能生之費盡於力田者之歲本二者與治田者之坪費三物而外皆不生隨盡之費而不得以能生名之其在工而他屬之民雖常俗所稱爲大利者而自彼學觀之則皆虛糜之事一用之後無所復生者矣

俗謂百工製造之家取天生物材環塊之惡傳之以人巧力作之精而其用以周其物以費則此屬所糜良非素食故曰生利之功也乃講農宗者則斥爲不然謂其費爲童然無所更生者其說曰工業之民謂其有所復可謂其有所生不可也極其能事不過復所前費之母財而益之以贏率而已其前費之母財何物材也器用也養工之既稟也凡此皆爲其業設者也物成以售而得贏是贏也則所以養廢居發業者也廢居發業者廠主工師是已方其與諸工以物材器用既稟使之操業善事也則亦逆計其後利以自執其所以養已者而豫食之矣故他日物成入市而得價也必復其物材器用既稟之費矣又必復其已之所豫食者而後爲平劣此皆折閱也是故工業之所贏其爲物與力田之所贏大有異力田之贏完贏也悉償農者歲本

二費。而加之贏率矣。外此尚有以納田主之租。是力田之農。其復母加贏。與工師同。而猶有所謂租稅者。爲工業之所無有。農之所能生者在租。去租則其於財也亦費之而無所進。然則工之所進者何耶。是故工之費財也。謂其能復其所已費者。勝於不能復者。用以繼續繩繩。相持不置可耳。顧其功止於此。謂其能生新財。必不可也。則謂之童然無所能生者。非過也。夫費財不僅能復。且有所生。不獨有以繼續田業。且可使國財日以加豐。是功也。舍力田之農。固莫誰屬。此本業之所以可貴也。

母財之用於商業者。其無所更生。與工業同。其業特有以使其財之繼續而長存。而於新者。則靡所進。方商之役財也。不能無費。其所得之贏利。乃所以周財出未復之頃之用費也。則名爲贏。不過復其所前用者而已。未嘗進也。則其不生同於工業也。夫謂工業爲能生後利者。以其於物材之粗。加以人巧之精。而其值進也。顧合一國之歲殖而觀之。其實則無所進。何則。益於甲者必損於乙故也。工之施巧也。彼豈能無所待而枵腹以從之也哉。物成其值之所增。必等諸其所食與糜者之數。故取其

全而計之。全國之財。必無進也。今假有工焉。取一便士之麻。染而織之。爲偏諸物。成而售於市也。價三十鎊。此但自偏諸而觀之。若此工益物之值。至於七千二百倍也。者可謂多矣。乃叩其業之時日。則二稔也。必以三十鎊爲所增。而謂二年之所食者。爲非損可乎。不可乎。使其人得三十鎊之價。而願售。則彼二年中。爲是之所費者。必等於三十鎊之數。則合而觀之。於國殖固無所進也。試觀業此之工。其成貨雖貴。而其人多貧。則知所得於其業者。僅足而無餘矣。惟力田之利。則又不然。其所供以爲租者。必盡復其所費。加贏之外。而後爲此。則此租者。其實進而無餘者也。

工商之民。欲富其群。必由節蓄。而農宗之所謂節蓄者。在賴其所得享之奉。所已區之費。而爲之。蓋工商之利。僅能復其所前費之數。而不能益多。非賴其所應受者。則無由有餘也。故使工商歲匪所節。而盡其享樂之量者。力作雖勤。群無從富。至農業力田之民。則凡母財之區。以養彼者。彼得盡而用之。而於群不獨無所損也。且久之不覺加富。蓋彼既復所費之外。尙有完贏。以爲增長漸多之利故也。國如法與英其

民多地主力田之屬。故俗驢蹏而國仍以富。若荷蘭若日耳曼。其民多工商。國財非力事。纖蓄無由餘。故富矣。而民鄙。民之生業既異。則風俗亦以不同。是故法英之民。雍容真率而愛人。荷蘭與日耳曼之民。則狹陋自私而苛刻也。

案農宗之說。其在當時。已有非之者矣。蓋以謂母財生於積蓄。則非節不富。不徒工商而後然也。節而至於苛刻鄙陋。則存乎事勢之所遭。不必節者盡如此也。其所云英法荷德二民之異。在昔已非事實。降至今日。愈不其然。斯密氏於農民不節斯富之說。固亦非之。而其著論之際。則往往右農牧而左商工。亦一時風氣之移人也。

工商食粟之民。非地主力田二屬。則無以爲養。其物材固二屬之所出。其糜食亦二屬者之所積儲。故統一群之。而言之。即謂工商爲有田與力田者之隸可也。與豪賄養執事於門內。工商各操其業於廛肆。而爲有田與力田者之所顧養。則一也。其功之無所生利。亦同也。是故工商雖多。其群不以富。其於國財。費者能復。則已足矣。

願必謂食粟之民爲無補。而爲有田與力田者之所不容。則又不可也。工被巧以成器。商通遠近之有無。而後一樣之生。無儲。銷地之利。以專而不分。出其產以易百貨。物良而費省。是工商雖不自生。而其所出於能生者。其利溥矣。能生者得不生者爲之相。而所生益多。則其效無異於能生者矣。

然則取工商之業。而困苦禁制之者。必非有田與力田者之利也。彼之利益愈恢。工商之爲競者愈衆。而後出利之民所取資於日用者愈廉。工不鋹。則本國之物產日滋。商不屈。則外國之產不可勝用也。

易地而觀之。彼工商之民。亦無取於抑損力田者。而使之利損矣。蓋國財之所以給工商者。則在力田者之贏利。必使農人能復其費而大有餘。夫而後國之工商日以益盛。顧不抑之道安在。無亦立至平之法。建大公之基。視民平等。使得長享自由之樂云爾。此誠富民之秘術。用之則通是三者之屬皆有利。夫固非哀其一以益其一之道也。

荷蘭日耳曼之民前謂其多工商而少治田者固矣雖然給是工商者亦舍治田者莫屬也其所與他國不同者在彼則灌輸於同國在此則挹注於異邦至其相待爲用之情未嘗稍異也

而尙農之國得商工之國如荷蘭日耳曼者亦大利矣農業不得工商之利爲用則其業不恆而難精今本國以政制之有失而工商之民以寡得彼之多者而彌縫吾之所缺乏者於事豈不益周也哉

是故農國疾惡商國務以計苦之設嚴障加重征於其入口貨者計之至不便者也惟重則物價必高外物價高者無異內產價賤也內產價賤則病農而緣畝之民不勸緣畝之民不勸欲其田疇之闢未之有也故農國欲所收之益厚而田功之日蒸也莫若反嚴權重征之術而爲之視彼之商如吾之農而待之以至平大通之政國之富也誰能禦之

使其政誠至平而大通則其國始也雖無工商之民繼也將不期而自有豈獨有

之而已。其興盛豐亨可操券也。蓋農國之所以乏製造者。不惟以其術智技巧之不及也。而大抵亦由於乏財。自其國制爲通平不苛之政。而本業之利常致大餘。而積畜至易。積畜易而母財日多。物盛而不過。不能盡施於田業而有利也。則求其旁通而工巧之末業奮矣。彼親見一國之內。物材手指之既廉。而賄功之廉食。又無虞其告乏。當是時也。使其製作之巧習。不讓於外人。則所致之物貨。必廉於遠國之間。關而至者。又無疑也。惜使製作巧習不及於專產之國者。而以材豐工廉之故。其始成之貨。亦可與遠致者埒價而售之。售之日久。而巧習益臻。則有以爭遠致之市。而遠致者以銷狹而愈昂。本產者以巧增而日賤。數稔之間。遠者自絕。不待禁也。且工業之事。其進無窮。彼既奪本國之市而有之矣。使其物之本值誠廉。而名品誠上。則所奪於工商之國者。不僅本國之市也。勢將掩他國之市而有之矣。農國工業其自無而有而盛如此。而推其本始。不外立不苛之政。俾主客自由而已。豈有他鑒巧哉。

案歐洲工商之利。廿年以往。必以英吉利爲巨擘。英之熟貨。幾被五洲矣。而得利

最隆則於印度中國是已。近歲以來，德以勝治之餘，而民力大奮，格致之精深，治
 禮之堅善，駸駸乎度英而過之。而法美荷義諸邦，亦通變而不條，顧英雖遇德之
 勃，與夫群雄競進之中，乃巋然尙有以自存，不至爲所奪而稍削者，則守自由商
 政之效也。然則農宗此論，其所明自由平通之義，不獨能使工商之業自無而爲
 有，自困而爲亨也，且能持已傾者，使不至於覆保，方衰者，使無及於亡。嗚呼！惟公
 乃有以存私，惟義乃可以爲利，事微之明，孰逾此者。

工業如此，商業亦然。以生熟二貨之日積也，母財日多，其勢非農工二業所能盡用
 之而得利也。則轉而用之於通商之業，以出其國所有餘之物產，且農國之商，其逸
 於商國之商，猶夫農國之工之逸於工國之工也。商國之轉貨而覓食也，必自遠而
 致之，而農國則求諸國門之內，而二者富有，故使舟船之堅，駕駛之善，即遜於外人，
 尙可使入市之貨，與他國之貴賤相若。設舟船之堅，駕駛之善，與外人同，則其貨必
 廉而有以奪他人之市矣。此由微至盛之所以易也。

故農國之利莫若布不苛之政。關梁利通。以徠外國之物產。而無錮彼工者。賄之利市也。蓋惟此而後。吾之地產可以得價而暢售。吾之地產得價而暢售。而後地利盡出。積蓄日多。積蓄日多而後。母財足。母財足而後。吾國工商之業以起。則向之資諸外人者。不轉瞬而爲外人之所資矣。

反是而觀。使農國設爲崇本抑末之政。凡外來之熟貨。或禁之使不入。或設甚重之權以困苦之。則勢有必至。是農國之自損者。有二塗焉。外貨以權重而價昂。夫通商者。終於內外物產之互相爲易而已。故外貨之價昂。無異內產之值賤也。是設重權以自伐。一也。外貨之廉平者。不來。則本國工賈之貨。獨銷本非所長。而據壟斷之利爲之。如此則其贏率畸厚。贏率畸厚。勢將使農業之母本已用者。改趨將用者。聚足生財之業。由此以減。二也。是故爲崇本抑末之政。而本業適以之傷。始則生貨降賤。而田業之贏率以薄。繼則熟貨日昂。而末業之贏率畸厚。末業之厚。猶本業之薄也。名曰崇之。實以抑之。事有爲之甚切。而所得之效。適反其所刻者。理財之政。多此類。

矣。

於是說者曰。由前之術。農業而外。工商日興。由後之術。農業雖稍損。而工商亦奮失。諸耕牧者。亦可收之於製造轉運。國尙未必病也。農宗曰。是大不然。夫農國行大通之政。俾主客自由。終之而其國之工商奮發者。乃奮之於至足之餘。發之於持滿之末。夫是以阜財備物。而國不病也。用崇本抑末之政。重困來貨。而使末利畸重。末利畸重。而民挹力田之毋。而注於末業者。乃屈能生之功。以伸徒復之業。且爲之於國財未充之時。而棄其國所可盡之地力。國其病矣。烏由利乎。前之爲術。順夫自然之理也。後之爲術。逆取而遂致之也。故即用其術。工商之業果興。其於國也。無所利。況乎由禁制之道。而謂民之興業。同於寬大自由者。吾不信也。（以上皆農宗學者之言。斯密氏所隱括而叙列之者。）

格斯尼者。法士之以農宗計學鳴者也。其於一國之歲殖。前三屬之民。所各收財利之多寡。與夫食粟之屬。所以徒能爲復不能爲生。而於國財莫能增益之情實。皆以

算術推較並表列之。其首列者嚴而著之曰計表。則以善當政令不苛民得自由之日是三屬者所各得之分利也。當是時也。國財所出將最多。極其天時地力之量矣。而其民所各享之利實亦最爲公平樂易。不可復加。過是以往。則國家禁之制有淺深。或地主之權力獨張。或末業之壟斷太過。由是生利之民受侵削而能生者寡。彼以謂農國之形。每一苛令之行。於自然之局必有所素。素則歲殖之收必有所損。歲復加歲。損之又損。其國財必以坐耗而民生以彫。且其彫耗之遲速亦視自然之局爲所素之淺深爲差。而表之序次亦視此爲上下焉。

吾觀輓近爲醫。有長於體而短於用者。其言生理也。則以謂欲一身之無病。飲食動作必有定程。違之疾作。大違之則大疾。小違之則小疾。疾雖小。必有所見端。不可幸而悅也。雖然。此自生理之精者言之。信如是爾。而自所見之人事以云。則人之居養至爲繁殊。而康強茁壯之夫。其所循者。固不皆一定之則也。且有灼然必傷之程。而或冒由之以無罰者矣。蓋人身盛壯之時。其中生生之機。自然有以相救而不自知。

故雖起居飲食稍有乖宜其害不皆見也。吾聞格斯尼達於醫理然於明體之事爲多。故其言治如其言醫。以謂欲身之健必循至精之程。欲國之休亦必用至公之政。自由之俗也。不知民既聚而爲群矣。其人人自顧身家。其中居養之事常欲其進而彌上者。病國之民所與善國同然者也。故其中雖時有偏苛之政。驅東之苦。而以民心自輔之殷。常不至於爲害。而其群仍有以自存。夫繳繞之政固不利於民生。而國財常進趨盈之機恆亦由之而少鬱。然其鬱也終不若其自然進力之多。則其進也猶自若。至欲使之退行則愈不數數見矣。今使如農宗之說必國政極公而民氣至舒者。而後其群有日富浸昌之效。下此者皆不能。則吾恐宇內自有合群成國以來將無一國焉可以企盛富治強之效矣。所幸上天仁愛陰臨下民其於種權國土進盛之機其尊可省否固也。而苟非極暴窮凶之荒國將皆有其自然者爲之除苛而解饒使民生不至於甚病亦如人一身之內苟非湛瀝痛自暴棄之夫其起居飲食雖有不調不盡如醫者之所戒而生機未絕其人不徒不死且安享康強者有之矣。

農宗計學要成一家之言爲言計者所不廢其說所頗謬大者在以工商製造之民純爲食粟如童山赤壤之一無所生耳吾嘗取其說而反覆之得駁議數條如左觀此則農宗之踏駁見矣

一農宗雖不以工商之屬爲能生然亦許之爲能復所費有以繼續繩繩使國財相持而不匱矣夫既許其能繼而不匱則不得徒名之爲食粟之屬而謂其全無所生也今使匹夫匹婦辟舍之後僅生一兒一女而去者其於國丁口雖無所增而謂爲無生則不可矣在他人夫婦之能生三子四子者國以之庶誠較前者爲能生顧不得獨謂三四子爲有所生而前之得二者爲僅復而童然無出也非有所生不能爲復故工商與農實皆生財之民而農之所生特較工商爲彌進耳使農獨受能生之名而工商則食粟而已此已甚之論也

二至其謂工商爲有田與力田者之隸與墾厥養執事於門內工商各操其業於隰肆而爲有田與力田者之所顧養則一此其說尤爲不詳也蓋即如農宗之說工商

雖不能生。尙爲能復。與臺所養之業。未能復其費也。日用飲食。純爲順養者之所出。其所爲者。役終則利盡。無所復留。而工商之業。財貨相生。若爲循復。已之所費。常留於成器積資之中。則二者固斷斷乎不可同而視之矣。吾論功而分之以後利之有無。所以謂工商爲能生後利之屬。而僮僕斯養官吏倡優。皆在無所能生之列矣。三農宗之說。必爲工商製造之屬。於國財僅能爲復。而於通國利資。絕無毫釐之增益者。亦非極摯之論也。就令如彼所言。謂此屬之所產者。如其所食用。年月日之所產。等其年月日之所銷。亦未得由此遂云其所業作者。於每歲地力人功所進之國財。爲無益也。假如一操工者。於稻登之後。以六月之功。成十金之貨。則雖彼於此半歲所食且用者。亦爲十金。而國要以此而獲十金之益富。當彼方食且用此十金之費之時。彼之所成。所值正等。則是十金未嘗費也。今設此十金者。爲僮僕兵吏之所食用。則半歲而後。國財必細十金。明矣。故即工業之民。所成之貨。與所食者正等。而都市之中。終存此十金之物。比諸他食他用。爲益多也。

案此第三條所駁雖所持之意不差而詞理鈍弱不足推倒原說如他處所駁者之犀利刻露也後之計家有云茲所辨者爲百工之事於國財有增進否平而觀之必有所增殆無疑義蓋即令如農宗家言工之所成適如其稟固已進矣況所成者合通國之工言之必過其所食者遠耶蓋使不過則工爲無所利之業夫民之所以盼盼勤動者爲利進耳使靡所利誰則爲之故使工業於國財果無有增則其業旦暮且廢繼續之不能更無論於進盛矣且農宗謂工之儲蓄必賴其所食用者而爲之此亦非也工之所儲同於田者之租稅非必賴其宜食宜用者而爲之也乃取之於贏利之中所既食既用而有餘者爲之耳此蓋藏者之常道也此其著駁優於斯密氏矣其云即工之所成適如其稟於國財亦爲有進者意將謂物之貴賤無常視求其用者之緩急方其以食成貨則貨之爲用固急於所食之稟不然莫之爲也急則值貴故曰進也惟斯密氏以人功爲物價之本而農宗所見適與之同故雖覺其說之非而駁之不盡如此使知價由供求之多寡緩急

而成則農宗工商無所生財之說將不待辨而自廢矣

四國財之實每歲地方人功之所出非節省不能加多不獨工商然也即力田之農亦然國財之益有二術焉生財之能事益宏民之治業益以巧疾一也能生之功爲之者益衆二也自能事益宏而言之則有人功手足之能事焉有假機成物之能事焉自百工之事易於爲分而分之可期於日簡而力田之業不能然則工商之益國財易而農民之欲益國財難也自生者益衆而言之民功不能徒衆也必先自母財之日充蓋母財者養功之食也而母財之充視乎積蓄積蓄在乎役財之衆與夫貸錢之家且自農宗之言農牧之民雍容而工賈之民纖嗇是工賈之能儉而善積實過於農牧之民然則能使國之母財日多而生之益衆者農牧之民又遜工賈矣五使農宗之論爲不刊則見諸實事者宜農國常富而商國常貧宜力田之民常逸而逐末之民常苦乃今不然則其說之不無漏義可決也蓋化國之財不盡於衣食而即以衣食言亦工商之國之所聚多於力田之國之所生也則試觀夫野與邑之

間邑居之子未必皆有田也。彼但奮其藝術之勤，能使物材歸之矣。而衣食之源亦以饒裕。商國，邑也。農國，野也。荷蘭以蕞爾之邦，爲王商之都會，四鄰生貨之歸之也。如水之趨壑，所食之穀，幾徧歐洲矣。彼常以熟貨之少許，易人生貨之多許。而農國反是。商國之所施者，養民常少。農國之所報者，養人必多。農國以其多養人之產，易商國之少養人者。彼豈知其虧折而爲是耶？民之所需不專衣食故也。由此言之，商工之民，其田之所生至少，而其力有以致天下之供。農國之民，緣畝雖勤，其所安坐而享者，轉不足也。然則農宗之說，又不必然矣。

農宗計學，其言雖不能無過如此。然其學要爲斯人最大之制作，而自有計學以來，此爲最近真實者。誠言治之家所不可忽者矣。其爲國殖財富之生，必由力田，不從異術。誠爲過狹而失中，而至謂民生利資不在實貨金銀，而在民力所歲登而可用享者，又謂欲地力民功所出之極其量，道在純任自由之美，而無橫加其禁制，則眞天下之公言。而其說之堅實不虛，雖與民羣相弊可也。農宗之說，歐洲大陸崇信者

多。此山人喜發闢之論。自以謂超越尋常。所知者非常俗所得與。故其區工商諸業。爲無利之功也。短之所存。即喜其說者之所由多也。輒近技淫。遂成風氣。於法國學者之中。別樹徽幟。號曰計學專家。始行於學。繼成於政法之條令。山之改絃。蓋民智方開。往往取前事之視爲固然者。更加審擇。而其間所施行垂業者。大抵以重本利農爲義矣。苦農之政。多所蠲革。即如貨田。向之以九年爲限者。今乃爲二十七年矣。向也田之所收。各部不通糴糶。今乃聽民自爲。關梁大通。出國無禁矣。農宗學者。著論日多。所發明者。不獨計學。道國刑政。并包爲說。而語不違宗。篤守格斯尼之初旨。故作述雖多。少新異者。獨理維雅民群天秩一書。最爲明備耳。格斯尼者。謙退樂易君子也。其爲法國一時學者所推仰。蓋無異於古希臘之碩師鴻宗。嘗聞米拉波馬基言曰。自有生民以來。其間制顯庸稱最重者。有三而已。一曰制爲文字也。有文字而後典章文物。得所託。爲傳。而民之智力日大。二曰制爲泉幣也。有泉幣。圖法通功易事之局以周。而民之生計日裕。而其三則格斯尼之計表耳。計表者。合文字

泉幣二者而明其用者也。故以文字泉幣爲父母而計表生焉。得計表而文字泉幣之功愈益著。此近世之大制作也。其有益於生民方始。至後世乃收其利澤耳。其推崇之不遺餘力如此。

國之於野邑二業也。其政俗各有所偏重。如今之歐洲諸國。則常重製造。若通商而以邑業爲利於野矣。有其重邑。則亦有其重野者。重野則其視製造與通商也輕。如泰東諸國。其尤著也。

重野業之國必首支那。支那以耕農爲斯民之本業。田傭之品。其在支那也。尙於工。猶工之品。其在歐洲之尙於田傭也。其民以買田主地爲治生之上策。爲人事之要歸。全而有之者上。賃傭而治之者抑其次也。賃傭之租不高。而耕者之利入常可恃。通商者。支那人之所鄙棄者也。往者俄國使臣德蘭支至其京師。嘗與其達官貴人論此事。察其意視叩關求互市者。猶行丐耳。支那民航海所通國。惟日本。顧不數數。而通國所以納通商者。僅兩口。假令其國家弛海禁。通商之局。必不如是狹也。而彼

則於本國及遠人之船舶皆禁之

民尙製造之業者則貨轉生而爲熟轉生爲熟而後貨少而值多而轉輸便此製造之所以常先通商也使國之大不及支那而內地之互通不易則必與外通而後有濟且使境內之市場已狹抑同國異部相轉爲難非有外通則工不競此通商之所以養製造也製造之致盛也必視分功之詳略而分功之詳略又視市場之廣狹支那地大民庶南北東西風氣衆殊江河之利交國中凡各省之產通於國而利已厚矣支那之內市實無異歐洲之互市也故不待外市其製造之業足已興雖然使支那以外市益其內則工業物產之盛必有更進於今者禁而絕之支那失也若支那於各國有舟舶之交通則各國之技巧爲所師資其民智將進其生事將益舒乃今閉關自封所通者惟日本固支那之大損也

外則有埃及印度二國之民自古皆有等衰而父子世守之業從之巫者之子常爲巫士者之子常爲士而佃作之子常備作焉百工之業亦有世守冠者之子必學爲

冠也。賸者之子必學爲賸也。巫之品第最上。而執兵之士次之。農之品先工。而工之品先商賈。

以其俗之重農。故國家於田功農利最重。埃及之先王。嘗爲渠閘以分尼祿河之水。利此爲古之職工。即今墾闢而行人。過其地。猶可想像也。印度之疏伽河。古亦有分渠。雖不若尼祿河之著稱。要亦天下鉅工也。故二國雖荒歉時有。而皆稱上腴。其民極庶矣。而至今中稔之年。外輸之粟。運舳銜舳。足以飽數國也。吾聞古埃及人以海爲鬼鄉畏途。而印度有根都教者。禁於水上作火。致操舟者於舟中不得事炊烹。則張帆遠駛之事。不禁自絕矣。故二國產所有餘而外輸者。皆他國舟舶爲之轉運。由此而銷場狹。亦由此而物產不蓄。不蓄者不獨生貨也。其熟貨爲尤甚。蓋熟貨之有待於銷場。重於生貨。業屨者年之所成。不下三百雙。而其家之用者。殆六雙而已足。欲所業而成者之無滯積。必銷之以五十家而後可。是故國中至業之工。五十家而一。或百家而一。至矣。至於農人。則若英法二邦者。殆半若其國之戶口。最下者亦

五而一之。然則一農之所殖。銷之以四家二家。若一家之不耕者。猶可以無滯也。故農國雖市場甚狹。無害。不若工者之必待廣市也。埃及印度古者雖無外通之商。而國中之水網密。而正交。有以周一國之內市。故無害也。況印度幅員廣。而戶口稠。則製造之工。雖不外通。而猶可以盛。獨古之埃及。其廣袤不及今英。則外市絕。而內者又微。斯難乎其爲工業耳。是以孟加拉一部。其出粟既殷。而製造之產亦夥。而古埃及及出者。惟麻布及他一二事之熱貨。終不若其出穀之美且多。當羅馬全盛時。實仰埃及爲版庸也。

若支那若古埃及若五印度分建之諸國。其君之賦稅。皆於田征之。所謂地租者。猶歐洲之什一賦。隨歲收之多寡爲上下。任土物征之可。案成法估其值。征泉幣亦可。故其國之君斤斤於田疇之治否者。蓋王用之舒蹙。恆視田畝之利爲盈虛也。

古希臘羅馬之方爲民主也。其農民之品第。亦較之工商爲高。而其於東方諸國異者。彼非重農民也。以抑工商而農相形重耳。考希臘諸部有禁民與外國互市者矣。

又希臘最重民之驅力。常設百戲以長習之。以工業之事多致羸弱。損撻捷之能。不利爲戰。故民間工業多令僮奴有罪者操之。而編戶齊民以爲禁。且既屬之奴矣。則雖其中有不禁之部。若雅典若羅馬。其民雖欲爲勢將不可。蓋工賈多豪者之奴。挾其主之財力地勢。執一業而爲之求利。則貧民編戶。雖與同業。必不能競而得利於其間也。且工業既以奴操之矣。則業之不張。又其勢也。奴之性習。主於奉法守常。鮮獨闢出新之慮。故分功之由略而加詳。器用之由粗而漸精。於奴皆無望也。古以來凡機器之省功。新法之利用。皆自由之民之所爲。奴無有焉。且使奴而爲省工之機。其主人未必以爲利也。且以謂奴惰而責之矣。是故同一工也。以奴爲之則費。平民爲之則廉。吾聞法士滿特斯鳩言。匈噶利礦瘠而其利厚。土耳其礦腴而利反減者。民功與奴功之異也。民功則多用機。而奴所用者如牛馬然。手足而已。當古希臘羅馬時。其時物值市價。見於傳記者少矣。而自可見者推之。則物之稍精者皆奇貴。如絲。則與黃金相權以爲易矣。當是時。歐故無絲。至者必由印度。則絲之甚貴。猶可以

道遠難致解也。然史言某妃買精麻布其價亦奇昂。麻布歐之所產最遠者不過埃及。而其價之昂如此。此不得以道遠難致解矣。則由於工費無疑。而工之所費者。機劣功僂而精者難就故也。即其時之耗毼精屬。價亦不訾。柏來尼言其染工每磅重者資百特。那理百特。那理以今幣言之。則三鎊六先令八便士也。他書載染工千特。那理亦有之。此其貴者固在染。而由此可推其屬之至奢。蓋非甚奢之質。所施之染。莫肯爲此貴者。柏來尼尙載其時台吉利那之價。台吉利那者。譯云隱囊也。其奇貴至抵今幣三萬鎊三十萬鎊之多。則尤令人狂而不信矣。吾聞阿爾柏諾師言。古之男女其衣材異者較今爲少。此說是也。至又謂以物材相詭之無多。故古之衣服。方今爲省費。則其說反矣。蓋當盛服極貴之秋。則物材之相詭者必少。而自工業之益精。前之貴者。後以易成而降賤。則材之等次必多。此自然之理也。於斯時也。貴富者既無以自別於常人。則爲之備物而多有者。以夸耀其軀焉。此物材少異之時。衣之所以不能不貴也。

一群之民。其中最重之商業。莫若野邑之自爲通邑業之物料。與其旦夕之所需。皆出於野。其所以與易者。則邑中人力之所製造者矣。是故邑野之間。雖若行之以財。而其終事也。實不外生熟之二貨。熟者貴。無異生者賤。生賤則野業必病。而緣敵之民不競。而求田隴之治。關難。世之言重農者。莫不云崇本抑末矣。不知末不可抑。末抑則邑業衰。熟貨貴。而野之生貨銷市日狹。吾未聞使銷市日狹者。爲崇本之道也。是故古之重農。而困商賈者。意欲其民之敦本業也。不知由其道而行之。商賈困矣。而農亦未有不從之者也。故徒持古者重農之說。以與商宗保商之說相衡。則重農者所爲之謬。過於保商也。保商者壅利源之自然。以使商之贏率加厚。雖流弊孔多。而求得所欲。何則。商固利也。重農者欲重農。而狹農產之銷市。重之不能。反以害之。夫邑野二業。既皆有國者所不廢。則互相爲用。意無取偏重於其間也。保商者欲民之用財趨於末業。重農者反之。而其質皆違自然。無益而有害。一群寢盛之機。坐其所爲而鬱。其中地利民功之所出。爲之日減而不見多。

是故保商重農伸此抑彼之方舉無可用而惟因任民生群理之自然而生理自進使其民不逐姦利而奮侵牟之私則一切宜聽民自爲以營生計其用力役財以與外物爲競之術民之自爲慮最詳取而代之烏有當耶使爲民上者必以是爲已責取民之所自謀而代之以爲如是而利如是而損則必少可而多誤蓋其所爲者本一人神智所不能周者也且所謂因任自然者亦非苟然無事已也則亦爲其所當爲者而已其所當爲者有極簡而易施之三事皆民上之大責也一曰禦外侮勿使民之身命物產爲外寇之所侵奪次曰禁民非用至平之法於其民以絕奸宄之暴其良弱此事誠難然以爲所禦可也三曰圖國功一國之中常有至大之工與夫不可少之局事非一家一黨之私利則莫之獨爲爲之雖其利常不復而其事又關於一群者甚鉅則國家之所不讓者正在此耳

夫是三者固民上之正職矣置而不爲則失其所以爲上者而治廢過此而事則侵民自由而害生雖然是三者不能徒爲也將必有其爲之之費此賦稅所以不可少

也。吾之全書，實分五部。甲乙丙丁，已前其矣。戊之所言，專明賦稅。首言國家不容已之度支，何者，宜賦於通國，何者，宜征之專民。次言成賦諸法不同，而各有其利弊。終言國債之事，何由而生，而於國殖利害何若。此部戊所以總分三大支而爲論說之次也。